

## **HIBULU** **Koyoto epi'ehina fayah**

*Hu'mau pana'amofahi baga'a le'mo babahi higo  
ka lamana'a lu limi'ehina*

<sup>1</sup> Hu'mau ai koyapa'i mono ka loli'ali bo enabaga le'mo babahi hu epalago enali enigiko enagakomagihi ka'a fato fato'mofahi kapo'a fato fato'mofahi lu epite biba biba hi'ahana. <sup>2</sup> To kana'a su halube'mu nohinogo ya'ma kana yatai pana'amofahi baga'a le'mo babahi higo ai ka legeya'a lu huto huto lu limi'ehina. Pana'a ai asaga melugu nasanamofahi afo'afu lolo huto minalibe luto lu eto'ehina bomofahi ai yanuguko mololago yamofahi silaga nasana huto hu'ehina. <sup>3</sup> Hu'mamofahi fana meha'amofahi sekele mamu'a hiti fuluna'a aitoga fi besa lo'ehinamo ni'ibe. To Hu'mau minoto lito hu'ehinamofahi legege hu'ehinamofahi aitoga ni'ina yanamofahi amuya'alo molo kehelito lulata nohina kaga'a yauba melugu kokulumagu ana'ina silaga'i le'mo hetofa hulata nohibe. Ai'a ya'ma foipanati nokala hu letolata nohina foya'a li su hoto ifoga gihti bo amuya'a hiti enebe ligi'ehina bo Hu'ma ai nohinalo lamaga'aga buto mino moloto mino'ehina yabe.

*Pana'auba agelo enebe ligi'ehinamofahi ka'a*

<sup>4</sup> Ai buto minoto agelo enebe ligi su ho'ehina yamofahi legegeto ya'ma Hu'mau emi'ehina gi'auba agelomagihi enigi'ani be ligit tigo

mino'ehina gi'a li'ehina. <sup>5</sup> Ya hu'ehina'mu  
 Hu'mau ka mone pana'a lu'ehina ya'ma agelo  
 mone'mofhi ma luto kaga lu emi'ehinamo  
 meni'igo pana'a aisigo kumu ma luto lu  
 emi'ehinaya fayahi keye'ahana:  
 Kai ya'ma pana'ni nohatagihe.  
 Nani'ni ya'ma yata'isi  
 kele'mo huto hu'ohube.

To agelo mone'mofhi ma luto meemi'ehina:  
 Nani ya'ma afo'afita lolo huto  
 nohunagihe.

To ai ya'ma pana'ni lolo huto minalibe.

<sup>6</sup> Mone ya'ma minoto kohe toto pana'a  
 ho lifinogo melugu limilube'mu nohigo  
 pana'amofhi kaga'a ma luto lu'ehina:  
 Hu'mamofhi agelo bona'a enali asaga'li  
 lipi emite foke ka li emilabe.

<sup>7</sup> To Hu'mau agelo bona'magi kumu ma luto  
 lu'ehinamo ni'ibe:  
 Hu'mau ligo  
 ai agelo bona'magih babeyafalo  
 li gelehe higo  
 yasi enemehi lolo hite nehabe.

To agelo'a  
 ya'ma koko pana'amagih enemehi  
 li gelehe higo  
 logo guluya mepofhi enemehi lite  
 lolo hite nehabe.

<sup>8</sup> To ya hu'ehinaya pana'amu ya'ma ma luto  
 lu'ehinamo fayahi keye'ahana ni'ibe:  
 Oho, Hu'mao. Kai kefa hisa amuya'a hiti  
 ya'ma minomo buto minalina'mu yabe.  
 To enali amuya'amofhi fatusa'a

lito minoto  
 enali foya hapa'alo le'mo fotogo huto  
 kaba hulata nohane.  
<sup>9</sup> ai ya'ma lamana kamofifi  
 kibita hulata nohibe.  
 To ana'ina foipanamofi kumu  
 fatehi lolo hu etolata nohane.  
 Ya hu'ehina'mu  
 Hu'mau, afokafu, kele'mo ho ti'ehinagi  
 to gelo bise'namofifi  
 kimi'ehinauba kalalukafifi  
 enebe ligi'ehigo  
 hofa tose'naka sipi huto hu'ehinagihe.

<sup>10</sup> Mone'ya Hu'mau ma luto lu'ehina ni'ibe:  
 Sipi Bo, kai koyapa'i lili'na kana'agu  
 asaga'i yata'a me'i hiti  
 anagu neminana hiti lolo hu'ahata.  
 To kokuluma hiti anagu neminana hiti  
 kayahakatu lolo hu etolata nohane.

<sup>11</sup> Me'mo hiti kokuluma hiti  
 asaga ana'ina'mu fa'mene minete  
 alipo fenene hilana'mu yabe.  
 Aku kaika mino amuya moloto  
 minalube'mu hane.  
 Enali ya'ma i kololo bilata gukete  
 ya suhi lolo hite minete  
 tafa lalune'mu habe.

<sup>12</sup> I kololo bilata gukete  
 ya suhi lolo hite nehinogo  
 kaika ya'ma gololo ti'ahanamofifi  
 li kakito moloto  
 kosaba'na li lolo hilube'mu hane.  
 Kaika nohatanamofifi ana suko huto  
 tafa melose minalube'mu hane.  
 To kufu kanaka ya'ma mino lito buto

mele'isi su mehalina'mu yabe.

<sup>13</sup> Hu'mau ai'a pana'amofifi lu emi'ehina ka'a ya'ma agelo mone'i ai ya'ma luto lu emilina'a meni'ibe:

Kai oto

lamaga'niga mino lito buto nohitogo  
fatehaka enele'mo tulu hinogo  
kigigusa'aluga minalana'mu yabe.

<sup>14</sup> Ya luto agelomagiji lu meepi'ehinamo ni'ibe.  
Agelo silaga'i enali meha'a hiti Hu'mamofifi kele  
kele'a nehanaya bona'i enubuto bilatanamagiji  
enehe'mete enele'mo bati hilabe luto Hu'mau  
enoho nolifibe.

## 2

### *Lubuto bilata nasana inomo tito mino'ehina*

<sup>1</sup> Ya hu'ehina'mu lali laga mehina kapo legeso huto bili lalune luto ka'a keheli'ohutamo ya'ma aku'i le'mo kosaba huto amuya moloto li pili koto kehelito minalune. <sup>2</sup> Agelomagiji enabagaguti kaga keya ka keye'ahana yanauba legeya'a lolo higo lusi kaga huto hu'ehina'mu bona'i moneuba ana agelomagiji kaga'ani hauta holatana ya'ma to keheli he'mito hega holatanamofifi hapa'a huto nohigo ya'ma foipana'a hiti ni'inaya yamofifi mone kegi'a foipana nona'a ali'ehinamo ni'ibe. <sup>3</sup> Ya hu'ehina'mu laliti hena huto lubuto bilatana tito mino'ehinamofifi he'minogoti buto fa'menena lolo hilina ni'ibe? To yata'a ai'a Sipi Bouba kana'amu kana'amu moloto lubuto bilatanamofifi kaga'a lu yege hoto molo'ehinamo yamofifi enegekesatu yigi hokolo hite keheli'ahana'a enali lu limi limi hago amuya molo'ehinamo ni'ibe. <sup>4</sup> Ya nohigo

ana kanagu Hu'mau ya'ma lubuto bilatanamofhi kaga'a lusiga lu'ehinamoya ai'a fato fato suhi to amuya'amofhi nasana to topa hose'namofhi ana'ina kosaba'i to babeyafa'alo fato fato'i li huto huto molo'ehina yabe. To Hu'mau ai lu kehelito ya'ma Sikalafu'mofhi nasana amuya'a ai'a lu'ehinalo moloto guna ito limi'ehina yabe.

*Yesu lubuto bilatanamofhi Sipi Bo'a nohibe*

<sup>5</sup> To me'i kosaba'na alahi huto hilina yanamofhi ka'a lali noluta ya'ma Hu'mau agelo enali kaba hilabe luto enele'mo ho tito melu epolo'ehina yabe. <sup>6</sup> Ya huto meni'ibe. Mono bukugu bo moneuba yamofhi ka'a Hu'mamofhi lu emi'ehina ka'a ma luto lu'ehina:  
Oho, Hu'mau bona'i ya'asimaka ya'ma henana'animu keheli epilata nohane?  
To bona'i ya fa'mene hana'amagihi henabe luto enele'mo bati huto kaba nohane?

<sup>7</sup> Yamofhi kana'a hupasi hinogo kai bona'i lebato agelomagitoga legege hu epolo'ahane.  
Kai gihti bomofhi gi'aloti sekele mamu'a hiti liyafa huse'na'a hiti bona'magihi epi'ahatamo ni'ibe.

<sup>8</sup> To kai bona'i enali silaga'namofhi kaba hi epalana'mu enele'mo hofa to'ahane.

Ya'ma Hu'mau *bona'mu silaga'namofhi kaba hi epalananamoya*, ya luto lu'ehina'mu bona'magi ana'ina enamaha'aluga mele'ahana silaga'na yabe luto lu hokolo huto lu'ehina. Aku yatai

kana'a ya'ma silaga nasana enamaha'aluga  
melete kaba hi'ahana'mu bu megolata nohune.  
 9 Ya huto Yesu bu go fe luto kehelilata nohune.  
 Kana'a hupamone ya'ma agelomagihi enalitogati  
 limito minoto Hu'mau lehe'mose'namu  
 keke'i luse'na kehelito fili'ehina yabe. Asaga  
 bona kumu yabe luto fili'ehina. Ya'ma  
 fili'ehinamanofifi gabu gise'namu Hu'mau le'mo  
 hofa tago fana meha'a hiti gi'amo li saga huse'na  
 hiti aitoga huto hu'ehina bu golata nohune. 10 To  
 Hu'mamofifi nasana'a silaga'i yanauba aitoga  
 agoya hu etoto minalibe luto ana'ina silaga'i  
 yanamofifi afo'afu lolo huto minoto ai'a panala'i  
 pana'i silaga'i sekele mamu'a hiti fana mehena  
 molo epalalube luto keheli'ehina. Ya nohuto  
 Yesu kohe tose bouba enubuto bilatanamofifi  
 Sipi Bo aii'a keke'i luse foya liloto buto li so kito  
 minalane luto Yesuhi lu eto'ehinamanofifi bati  
 hu'ehina yabe.

11 To bona'i foipana'ani li he'mi epololata to  
 komopa'ani le'mo bati hulata nohina bo ai hiti  
 to enele'mo lamana hu'ehina bona'i hiti enali  
 afo'anifu moneko'i nohibe. Ya hu'ehina'mu Yesu  
 ya'ma yagapana'amu nogonamu tamu'nise luto  
 lu epito keheli'ehigo buya menohibe. 12 To Yesu  
 ai Hu'mamofifi lu emi'ehina ka'a ma luto ni'ibe:  
 Oho Hu'mao.

Kai kumu nogonamu tamu'nimagihi  
 enogobisalo ka lu epoloto,  
 to silaga li gehesa nehanalo  
 kai kumu nama luto kofokehi lilube.

13 To ai lu'ehina ka mone'a ma luto hiti ni'ibe:  
*Hu'mamofifi keheli ule'ale huto minalube.* To  
 mone'a hiti ma luto ni'ibe: *Ya'ma nani'ni hiti to*

*Hu'mau yagapana'i nimi'ehina'a hiti lali moneko  
koguna asaga'i nohune.*

<sup>14</sup> To Hu'mamofahi yagapana'a enali ya'ma enugufa'ani hiti golaha'ani hiti ya'asigo mi-nago nehanaya Yesu ana suhi huto lali lug-ufa to hapati li lolo hu'ehina. To ai'anofilito ya'ma bona'i fililatanamofahi afo'afu ya'ma kaba bo, Sataha amuya'a hiti bomofahi Yesu amuya'a ho he'mito le'mo sibina hu'ehina yabe.

<sup>15</sup> Ya'ma bona'magi fililatanamofahi enelesa lulata nasanauba asaga yupahi naga igo mine lite bite mine'ahanamagihi Yesu gulu ho epalalube luto yamofahi lolo hu'ehinamo ni'ibe. <sup>16</sup> Yamofahi nasana ya'ma agelo enele'mo bati huto ya enali'ani'mu enehe'malatafihe? O'e, ya huto meni'ibe, lali anokehelune. *Ai'a Abalahahi panana'a lali lele'mo bati huto lehe'molata nohibe,* lite mono bukugu fayahi keye'ahanamo ni'ibe.

<sup>17</sup> Ya hu'ehina'mu Yesu ai lali'i mamufa gi letolata boti sipi bo komopa'a molo letoto to Hu'mamofahi gobisalo foya amuya moloto lilatanamofahi mi-nalibe luto bona'i lali'i foipanati okala hu letalibe luto ya'ma ai henana hu'ehibe? Ai lali hiti gonamu tamu'a lolo huto'a fili'ehinamo ni'ibe.

<sup>18</sup> To lali tegi huto lolo huloto'a keke'i luse'na kehelito fi taga hu etose'nagu buto folo'ehinamo ni'inaya yana'mu bona'i lalitoga fi taga hu epele-lata nasana ya'ma huto hu limilenogo lehe'moto lubuto bilina'mu yabe.

### 3

*Yesuhi gi'auba Mosehi be ligi'ehina*

<sup>1</sup> Ya hu'ehina'mu mono bo nalalu'nigita, koku-lumagu naga'i lolo hilabe luto Hu'mau elesa molo lepi'ehina. Lenali keheli emilata nohutamofahi mono ka leli'ali bo to mamufa gi emilata bo sipi'a Hu'mau ho lifi'ehina bo, Yesuhi bu go bati hite bu ge'ehilo. <sup>2</sup> Hu'mau ana foya lilibe luto le'mo ho titu lu eto'ehinalo ai'a ya'ma Moseu Hu'mamofahi yagapanan'amagitoga minoto Hu'mau lu'ehinalo minose suhi huto foya afo'afu lolo huto minoto lubuto bilatanamofahi foya amuya moloto mino lito buto mino'ehinamo ni'ibe. <sup>3</sup> Nohi gi-lata nohina bomofahi gi'auba nopofahi gi'a be ligi'ehigo ana bomu'i bona'magi gi'a liyafa hilabe. Ana suhi huto Yesuhi gi'auba Mosehi be ligigo Yesuhi fana meha'a hofa to'ehina'mu yabe. <sup>4</sup> To nohi ya'ma li huto hulatamofahi ya'ma bona'magita gilata nohuta ni'inaya ake-heli'ohune. To ana'ina silaga'i li huto hulata'a ya'ma Hu'mau ai'a lolo hu'ehina yabe. <sup>5</sup> Moseu ai Hu'mamofahi noha'a legi lolo hite nehana bon-atoga minoto Hu'mau lu'ehinalo agoya hu emitofoya amuya moloto lito minoto Hu'mamofahi ka'a alihi lu huto hilinaga lu yege ho'ehinamo ni'ibe. <sup>6</sup> Ya huto mino'ehinaya Kilisitou ai ya'ma pana'auba Hu'mamofahi noha'alo lolo hi tegi hite mine'ahana bona'magihi kaba nohu epoloto Hu'mau lu'ehinalo foya amuya moloto lilata no-hibe. Noha'aya lali ya'ma nohune. To yamofahi fa'mene'mu meni'ibe. Ana'ina le'mo babahi hu leto'ehina yana'mu luto ka'a li pili koto agoya hu emitofoya minoto komopatigu bati nohinogo keheli emitofoya mino lito nobinogo kanati su nehenogomo ya'ma Hu'mamofahi noha'a lolo huto nohune luto

lilune.

*Hu'mamofihu minoba minoba hepato bu neheti-luta ka'a*

<sup>7</sup> Ya hu'ehina'mu Sikalafu'uba lu'ehina ka'a ya'ma mono bukugu ma lite keye'ahana:

Yatai ya'ma lenali Hu'mamofihu nogo'a keheli'ehilanamo,

<sup>8</sup> ya'ma fa'mene ka meto Isilaeli bona'i enali ipakafa helete siko hite

Hu'mamofihu mi'i melete nehana ya suhi hite komopatini fi hekini lenogo meminalo.

<sup>9</sup> Tatatinigi enali analo kufu kana'a 40 nobigo

ana'ina lolo huto moloto hu'ohunamofihu be gelata hi'ahanamo ni'inaya kegeiyo hi netete

nimi'i nama'i mele nete'ahanamo ni'ibe.

<sup>10</sup> To nani yana'mu ka epekito

enali kumu ma luto lu epolo'ohunamo ni'ibe.

Enali kana'amu kana'amu negi nagi enegekesa kehelilata hi'ahanamo nehabe.

Enali nani kapo bu go bebe sete bu galana'a mehi'ahanamo ni'ibe.

<sup>11</sup> Nani ka epekito ma luto lu laga huto lu'ohunamo ni'ibe.

Enali minoba minoba nohuna hepato bilune'mu menehana yagi

nani hiti meminalana'mu yabe.

<sup>12</sup> Nalalu'nimagita, lenalitogati mono komopatini go'nupa ginogo minete mono ka keheli he'mite minoba minoba huse bo, Hu'mamofihu lenemegeza hi emi lalagi kaba hite minalo. <sup>13</sup> Ya

nehite kana'amu kana'amu to kanati fa'mene ni'inogo foipanamofifi fi taga hi etete mi'i ma'i mololatanamofifi lenalitogati bo mone'mofifi amukele li etenogo komopa'a li hekini lo lalibe lite ai ekesa linogo ai ekesa linogo hite le'mo hetofa hite minalabe. <sup>14</sup> Lali asaga'i hapi fito keheliya ise'na ya'ma to fifa ilata nohuta li gehe-salo nehetilutamofifi ya'ma Kilisitohi agoyana'a guna moloto li pili koto nominota bona'i lolo huto nohilune.

<sup>15</sup> Kaga mone hiti mono bukugu ma luto ni'ibe:  
 Lenali yatai  
 Hu'mamofifi nogo'a keheli'ehilanamo  
 yamofifi lenali koyapa'i  
 Hu'mamofifi ipakafa helete  
 kegeiyo hi'ahana.  
 Ya suhi hite  
 komopatini fi hekini loleno  
 ya mehilo.

<sup>16</sup> Yamofifi hiya bona'magi Hu'mamofifi nogo'a keheli he'mite hega helata hi'ahana? Moseu enele'mo ko hetago Iyipi metogati e'ahana bona'magi asaga'i enali'ani ya hi'ahanamo ni'ibe. <sup>17</sup> Kiyi'afi kumu Hu'mau kehelito ka epekigo kufu 40 bu'ehinamo ni'ibe? Yamofifi foipana lolo hilet fa'mene ka meto fili gehesa hi'ahana enali kumu ya'ma suhi lolo hu'ehinamo ni'ibe. <sup>18</sup> Ya hulago kiyi'afi kumu Hu'mau kehelito lu laga hu'ehina ka'a ma luto molo'ehinamo ni'ibe? Minoba minoba huse hepato bu menehetilana'mu yabe. Yamofifi ka'a keheli he'mite kegeiyo hilata hi'ahana enali kumu ya luto lu'ehina. <sup>19</sup> Ya luto lu'ehina'mu

ma luto keheli'ohune. Enali Hu'mamofihu ka'alo keheli he'mite aitoga agoya hu meemi'ahana enali kumu yabe luto minoba minoba huse hepatoga bu meneheti'ahanamo ni'ibe.

## 4

<sup>1</sup> To ya'ma minoba minoba hepatoga bu nehetilabe luto Hu'mau lu leto'ehinamo ni'ibe. Yamofihu kaga'a lu molo'ehinana su mehalube'mu hibe. Ya'mu lenalitogati kegi'a moneubafi moneuba ana kapogu buto tele bi haya kolo lalibe luto lelesati linagi kaba hu bati hilo luto nolune. <sup>2</sup> To ka lamana'a enali'i lu epi'ehina'ago huto lali'i lu limi'ehibe. To enali ya'ma ka'a kehelilete komopa'anigu li memalago limito keheli ule'ale hite memino'ehina to enalitoga futu'ago mino'ehina yabe. <sup>3</sup> Lali ka lamana'a keheli amuya moloto keheli'ohuta'amagita minoba minoba hepatoga bu nehetilata nohuto Hu'ma hiti lali hiti analo fuli nominone. Ya hu'ehina'mu Hu'mamofihu ka'a keheli he'milata nehana'mu yabe luto ai ma luto lu'ehina:

Nani enali'i ka epekito lu laga huto  
ma luto ka molo'ohuna.

Enali ya'ma minoba minoba huse hepatoga  
bu nehetite  
nani hiti meminalana'mu yabe.

Yamofihu metoga hapi fito ana'ina hiti silaga'i lolo huto lili'na'a su holoto mino lito buto minoto alahi sibigopa anamofihu ka'a lu'ehina. <sup>4</sup> Ya hu'ehina kana'a 7 yupapo bu nobe ligigo yalo'i mono bukugu kaga mone ma huto ni'ibe: *Hu'mau ai'a ana'ina silaga'i lolo su holoto kana'a nayahi lugaga loemo heleko malago basu*

*bi'ehina.* <sup>5</sup> Yana higo ifoga ya'ma ma luto aku lu'ehina: *Enali ya'ma minoba minoba huse hepatoga bu nehetite nani hiti meminalana'mu yabe.* <sup>6</sup> Bona'i mone'amagi kohe tete ka lamana'a kehelite Hu'mamofahi minoba minoba hepatoga mebi'ahana. Henabe lutobe? Enali ana ka'amofahi keheli amuya memele'ahana. Ya hite, Hu'ma hiti analo fuli memine'ahana. To mone'amagi kehelite aitoga agoya hu emite nohinalo bite ai hiti fuli mine'ahana yabe. <sup>7</sup> Ya hu'ehina'mu yatai yupahi Hu'mau ya'ma bu nehetiluta kana'a aku'i molo'ehina. Ana kana'mu Hu'mau yatama kana bulago Tebitihi bagaguti lu'ehina ka'a ma luto mono bukugu lu moloto lu'ehina:  
 Lenali yatai ya'ma Hu'mamofahi nogo'a  
 kehelilanamo yamofahi  
 komopatini fi hekini lose  
 meminalo.

<sup>8</sup> To koyapa'i Yosua Hu'mamofahi boana'magihi enele'moto minoba minoba nasanamofahi hepa'amofahi legeya'a li huto hu epolo'ehinalo ni'itita, Hu'mau alahi kana'alo basu bise'na moneko kumu melitita'mu yabe. <sup>9</sup> Ya hu'ehina'mu ma luto nokehelune. Hu'mamofahi bona naga'a lali minoba minoba huto minose'namofahi fuli'a mone fa'mene ni'igi ana huto koyapa'i Hu'mamofahi kana <sup>7</sup> yanagu basu bito mino'ehinamofahi bona'amagita ana huto mino'ohuta <sup>10</sup> Hu'mau foya li su holoto mino basu bi'ehina ana suhi hite bona'i mone'amagi enali lili'na'ani li su hete'ani Hu'mamofahi minoba minoba huse'nalo mine malalana ya'ma Hu'ma hiti enali hiti mine'ahana yabe. <sup>11</sup> To

lalitogati moneuba amuya memolose foipana nasanamofí kumu luto bona'i koyapa'i ka'a pelesa ite Hu'mamofíhi minoba minobanamofíhi hepatoga mebilune'mu enipakafa enehese kapolo bi'ahanamo analo'i bu lalunigi minoba minoba hepatoga bilune luto amuya malalune.

<sup>12</sup> To Hu'mamofíhi ka'a ya'ma amuya moloto mino kosaba'na huto minalina'mu yabe. To emita'i mone baga'a megesa'aga to okaba'aga heta pita huto ya'ma be ligito ni'ibe. Anatu laga humo limito lemehi komopati to felisati apilifati hiti i loko hulata nohibe. Ya huloto komopatitu kehelilatana to keheli laga hulatana yanamofíhi hapa'a li huto hulata nohibe. <sup>13</sup> To ana'ina li huto hu'ehina ya'ma moneubafi moneubafi Hu'mamofíhi bulo ya'ma suguna'i nasana mone meni'ibe. Ai bulo melugu kokulumagu ana'ina silaga'i sa gi'ahanagu meni'ina to li hokolo huse'i ni'ibe. To mone yupahi lali asaga'i li lolo hulata nohutamofíhi hapa'a yanamofíhi Hu'mamofítoga tito ai bulo lu eminogoti ka foya li letalina'mu yabe.

### *Yesu lali'i sipi mamufa gi letolata bo nohibe*

<sup>14</sup> Yana'mu lali mamufa gi letolata bo sipi'a tito mino'ehina moneka nohuta bo Yesu Hu'mamofíhi pana'a aisigo ya'ma kokulumagu Hu'mamofíhi maha'aluga tito nohibe. To ana suhi huto nohu letana ni'inaya mono ka'a lulata nohuta yamofíhi li pili koto lubuto bilatanamofíhi ka'a keheli ule'ale huto mino lito buto minalune. <sup>15</sup> To mamufa gilata bo sipi boti ai kumu keta lebesigo ya nohutogo

komopati lapa bise'namofahi kehelito lali'i bu logoto menohe'mi letabe. Lalitoga limi'i lama'i moloto lito nohinamofahi huto hulata nohina ana suhi huto aitoga mi'i ma'i moloto lito fato fato'mofahi huto hu'ehinamo ni'inaya aitoga foipana mone'a meni'inamo ni'ibe. Yana'mu ai lali kumu ginaga filata nohibe. <sup>16</sup> Ya hu'ehina'mu lali Hu'mamofahi kefa hisalo tubuto yalo lelesa meligo lehe'mose'na'a ni'igo tito babahi hinogo nehetilune. Ya nohinogoti keta huse nasana moneubafi moneubafi oto logobisalo neminenogomo Hu'mau ai'a lali kumu ginaga fi limilina'mu to lehe'malina'mu komopa'atu molo leto'ehina ya'mu luto nohinogo ana'asi lele'mo bati hilibe.

## 5

<sup>1</sup> Melugu bona'i enalitogati mamufa gilata bona'mofahi le'mo ho ti'ehinauba Hu'mamofahi lili'na'a liloto to bona'i enele'mo eto hu'ehina. Ai asaga bona'magitoga enali kumu yabe luto Hu'mamofitoga huto hu emiloto foipana'animofahi nasanalo lokiya fi emilabe luto enele'mo molo'ehina. <sup>2</sup> Ana mamufa gilata bo ai'a hapa'a mone amuya memolose nohigo fato bona'magi kaga mekehelilata to foipana lilata nehanamagihi fulu huto ginaga fi epite agoya hu epilata nohibe. <sup>3</sup> Ya nohuto ai amuya memalalina'mu yabe luto bona'magihi foipana'mu to ai'a foipana'mu hiti Hu'mamofitoga lokiya fi emilibe. <sup>4</sup> Foya tito mino'ehinamofahi bo mone'i ai komopa'aguti kagalo ana foya lilube lutomo meni'ibe. Mamufa

gilata bo mone'mofahi Hu'mau kehe ito le'mo eto higo foya'a ya'ma lu emilenogo bati huto lilina'mu yabe. Alonihi ya'ma koyapa'i Hu'mau kehe ito ema'alo anamofahi lolo hu eto'ehinamo ni'ibe.

<sup>5</sup> To Kilisitou ai ana suhi huto ai'amo kehe-ligo tigo yamofahi mamufa gilata bo sipi bo lolo mehu'ehinamo ni'ibe. Yamofahi Hu'mau ma luto lu emigo lolo hu'ehinamo ni'ibe:

Kai ya'ma pana'nimo nohane.

Nani yamofahi yatai ya'ma  
kele'mo huto nohube.

<sup>6</sup> To kaga mone'a hiti ma luto lu emi'ehina:

Kai ya'ma Melekisitekihi babeyafa huto  
mamufa gi emilata bo nagaluguti  
huto hilata minomo buto  
foto'i moloto minalane.

<sup>7</sup> Yesu ai metoga mino'ehina kana'alo Hu'mamofahi kehe sipi igo bu nogoya nolimigo sipi nogo moloto buka tito ya'ma fili'ehinaguti le'mo gelehe higo yamofahi buto bise bo, Hu'mamofahi amuya moloto loka ho'ehina yabe. Ya higo Hu'mamofahi maha'aluga limito mino'ehina'mu luto to agoya hu emise'namu Hu'mau keheli emi'ehina. <sup>8</sup> Ai Hu'mamofahi pana'a nohinaya fa'mene ya'ma keke'i luse'na keheliloto keheliya ise'namofahi hapa'a keheliya ito agoya hu emi'ehina. <sup>9</sup> Ya huloto bu segito mino'ehina bo lolo huto ai ka'a keheli emi'ahana silaga bonatoga enali'i enubuto bise'namofahi nekisa'a meni'inamofahi afo'anifu lolo hu'ehina.

<sup>10</sup> Ai ya'ma lali'i mamufa gi limilata nohina bo, sipi bo Melekisiteki ai'a nagatogati babeyafa huto minalibe luto Hu'mau lu yege ho eto'ehina yabe.

*Mono ka he'mi lalabe luto lipoti lu nolimibe*

<sup>11</sup> Yamofahi ka'a babu luto ni'inaya lenali le-negekesa legeso hite kehelilatanamofahi tupa'asi nehinogo lu lepilube luto kehel'i'ohuna komopati*n*i keta nohibe. <sup>12</sup> Lenali kana'a yatama mono ka kehelite biba biba hite minatita luga'a fi lehe tete guyaka guyaka lite li epitita bati hitine. To ya'amagihi lenali mono'mofahi hapi fise'na'alo ya'ma aku'i lu lepilatanamofitoga mine mele'ahabe. Lenali komopatinimofahi nose'na amuya'a hiti menalana'a hite minalana legegeto nehabe. <sup>13</sup> Ya'ma fono ka ni'inaya olopa bona'magi amuya'a hiti nose'na nenanaya amihi nelata nehana'a enali inapuhi nehabe. Nehabe luto lu epalalutaya ya'amagihi mino fu lite minose'namofahi hapa'a ya'mu mone kehel'i fotogo menehabe. <sup>14</sup> Nose'na amuya melete yamofahi olopa bona'magi enali nasana ni'ibe. Enegekesa komopa'ani hokolo higo foipanamofahi bati'namofahi hapa'a kehel'i bebe sete nehana enali nasana ya ni'ibe.

## 6

<sup>1</sup> Ya'mu ya'ma lali ya hu'ehibe luto Kilisitohi kaga'amofahi biha'a hapi fi'ehinamofitoga ya'ma melenogoti ni'inogo ka'amofahi megesa'a lolito tito nebinogo bebe sose kaga lulatanamofahi kapo'a ya'ma moloto mino lito buto bilune. Mono kamofahi luga'a ya'ma tafa'a nomoloto futu'amofahi foya henabe luto aku'i hapi filune? Komopati lemeha'a li gelehe hilatana to Hu'mamofahi kehel'i emilata nohune. <sup>2</sup> To mono nagami'i fololata nohuta ka'a to lataha'anilo

layahi moloto lusa gilata nohuta to filise'naguti ho tise'na to foipana lolo hu epoloto ka foya lilata nohuta buba buba huse'namofifi kaga'a hena'mu aku'i yamofifi lito hapi filune? <sup>3</sup> Hu'mau keheli'ehinogo lali ho tito abilune luto kohe toto kapo lamana'agu malalune.

<sup>4</sup> To mono ka keheli'ahana bona'i luga'amagi nehinogo Hu'mamofifi fana meha'auba komopa'ani le'mo besa lago to kokulumaguti nose'na nete enele'mo'ehina to Sikalafu'i mone'i li'ahana enali yanamofifi enemegesa hi emite minenogomo hena hinogo aku'i enele'mo gelehe huto tiligi salune? <sup>5</sup> To enali Hu'mamofifi ka'a hetofana ni'ibe li'ahana to alihia huto hilina kana'amofifi ule'ale huse'namofifi amuya'a laga'a akeheli'ahana. <sup>6</sup> Enali ya hite minete alihia aku'i ya'ma asaga'i li he'mite enemegesa hu emi'ehilana yanamagi Hu'mamofifi pana'a aku'i malipu yafalo hete boana'magihi enubulo le'mo yege fise'na kalana'i mele etalana kehelilina ni'ibe. Ya'ma bona'i komopa'ani aku'i enele'mo gelehe hinogo tiligi solata hilinamofifi mone meni'ibe.

<sup>7</sup> Me'i monetoga ko'uba kana'amu kana'amu iba iba huto minoto le'mo gefa gefa noigo bona'magi foya lite nose'na he kelelata nehago nose'na li huto huto hu epilata nohinamofifi ya'ma Hu'mau lusa'amofifi legeya'a huto hulata nohibe. <sup>8</sup> To me'i monetoga foyaguti kifina to kifi kasoa hiti nasanago mino baga ilata nohina'mu yabe luto ka me'i lolo huto minana'mu Hu'mau gumi'i halifi mehalibe ai foya'a yabe. To ana metoga logouba lalube'mu hibe. Ya'ma

fono kaguti me kumu lu'ohuna yamofiji me'mofi kumu menolube. Bona'magi kumu lu moloto nolunagi kehelilo.

<sup>9</sup> Nalalu'nigitabe, nani ka noluna ya'ma lenali le'mo tiligi salabe luto keheli'ohuto menolube. Lenubuto bise nasana yamofiji legeya'a lenalitoga huto holito buto minalibe luto keheli'ohuta nolube. <sup>10</sup> Hu'mau ai'a mone li sibina huto ya huto menohibe. Lenali ai kumu yabe lite foya'a lite komopatini minalanamofiji lamana'a yamofiji Kilisitohi yagapan'a enele'mo bati hite lenemehi emite enehe'malata nehanamo yamofiji ai'a yana'mu ekesu mehalina'mu yabe. <sup>11</sup> Lenali kumu ya hilabe luto nolube. Lenali asaga'nalog a moneko legege hite keta mehuse hite minenogo lele'mo hetofa hilina nasana ya hilune lite fifa ite lengegesagu melete mine lite netinogo kana'a su halina yalo nehetilabe. <sup>12</sup> To lenali fa'mene fuli meminese bona'i luga'amagi kehelili ule'ale hi'ehite to kosele'i melenehenogo geba hilete minete ana'ina'mu lu molo lepolo'ehina yamofiji lilata nehana bona'magi bilata nehana kapo analo enigigusa ite bilabe luto nolube.

### *Hu'mau kaga lu molo'ehina ka'a*

<sup>13</sup> Koyapa'i enalitogati mone Abalahahi Hu'mau kaga lu eto'ehina bo mone tito mino'ehinamofiji gi'alo lu laga hilube luto kehelii'ehinaya sa huloto sipi bomofiji gi'a mone be meligiliba luto ai'asigo gi'alo lu hetofa huto lu molo eto'ehina. <sup>14</sup> Lu moloto lu etoto ma luto lu'ehina: *Nani'ni ya'ma lusa aku'i gi ketalube'mu nohuba. Ya huloto kai yagapanaka*

*babu luto li futili huto li huto hu kimiruna'mu yabe.* <sup>15</sup> To Abalahahi Hu'mau lu eto'ehina kaga'mu yabe luto kosele'i mehago geba huto mino lito buto legeya'a ligo ai'na lolo hu'ehina. <sup>16</sup> Bona'magita yahi tito bo mone'mofifi gobisalo le'mo ule'ale huto lu laga huse ka nolinogoti lalitogati tito mino'ehina bomofifi gi'alo lu laga huto o'e lulatana yamofifi huto mehilina'mu yabe. <sup>17</sup> Yanamofifi Hu'mau ai'a bona'i lu molo epolo'ehina yamofifi Hu'mau kenetufa'a le'mo gelehe huto fato ka lilifihe? lite enegekesa loemo keheli lalabe luto komopa'atu keheli hetofa higo lu'ehina. Anamofifi hapa'a li huto hilube luto lu molo epolo'ehina nasanamofifi ka'amofifi gupisalo le'mo hetofa huto lu laga huse kaga ya'ma molo emi'ehina. <sup>18</sup> Hu'ma ai faga faga ka'a meni'ina bousa li hetofa huto ka'a loemo lu'ehina ya'ma li ho tito limilago ai'a maha'aluga mino fala ki'ohuta lali ana'ina lele'mo keta mehuse lubuto bi'ehina yamofifi legeya'amu fifa ito li pili koto amuya moloto lilune luto kehelito minalune. <sup>19</sup> Lele'mo babahi hu'ehina'mu luto fifa ito geba huto minalatauba komopatimofifi lukesati lolo hinogo nohinogoti kokulumalugu mono nohi komopa'aluga katatu'i hekini lo'ehina ya'ma nonugu ai kapo li hokolo higo Hu'mamofifi gobisalo lele'moto tilata nohibe. <sup>20</sup> Lali kumu yabe luto le'mo kohe to leto'ehina bo, Yesu ai yamofifi analo lele'mo kohe to lito buto sipi mono nopofifi komopa'agu bu neheti'ehina ai Melekisitekihi naga'a suhi huto lali'i mamufa gi emilata bo lolo huloto mino lito buto asaga kana'amu kana'amu bigo

minalube'mu nohibe.

## 7

### *Melekisitekiu Hu'mamofiji mamufa gi emilata bo yabe*

<sup>1</sup> To Melekisitekiu ai ya'ma Seleme hepatoga gihiti bo to Hu'mamofiji sipi bomofiji ai mamufa gilata bo mino'ehina. Abalahau ai fato hepato buto enighiti bona'magihi kalana'i moloto enoho logo'ehinalo i behe huto noago Melekisitekiu ai buto kapolo fo tula hoto Abalahahi be tigito lusa gi eto'ehina. <sup>2</sup> Ya hu etolago Abalahau lubaguti bauna nasana leka soto guna mololoto nayahi loemo su hola hola higo molo'ehinaguti moneko moneko lito Melekisitekihi emi'ehina. Ya'ma Melekisitekihi gi'amofiji hapa'a lali katiguti ya'ma gihiti bo bebe sose'namofiji afo'afu mino'ehina. To Seleme hepa'mofiji gihiti bo mino'ehina hapa'a lali katiguti ya'ma fulu huse'namofiji afo'afu nohina yabe. <sup>3</sup> Melekisitekihi ito'afugo afo'afugo mine'aha'inaya etigi'atiti mekeheli'ohune. Ai'a enigiko enagako bona'a asaga'i fenene hu'ehigo mekeheli'ohune. Enali hapa'animu sa sa hite li huto mehi'ahanamo ni'ibe. Ai minoto lito hu'ehinaya, ito'afu keto'ehina kana to minoto fili'ehina kana'a ya'ma mekeheli'ohune. Ai Hu'mamofiji pana'a legi huto mamufa gilata nohina bo molo emitio minomo buto mino'ehina nohibe.

<sup>4</sup> Sipi gihiti bo nohinagi kehelilo. Melekisitekiu ya'ma gihiti bo lolo huto nohigo bahalotifu legeya'a Abalahau ai minomo tito mino'ehina,

aiya lubaguti bauna nasana lamana'alog a leka soto guna mololoto yogo fe'nohi nayahi su hola hola huto ni'inaguti Melekisitekihi moneko moneko li emi'ehina yabe. <sup>5</sup> To Libaihi yagapan'a luga'amagi mamufa gilata bona'i minalabe luto lu epolo'ehina. Enali hiti boana'i enalalu'anigi hiti koguna ite Abalahahi naga'i moneko koguna lolo hi'ahanamo ni'inaya enalitogati ana'ina luga'a huto hu'ehinaguti nayahi su hola hola higo ni'inaguti moneko moneko lila lila hilabe lite li'ahana ka'a li nupa hite nelite yamofiji lu laga hi epelete li'ahana. <sup>6</sup> To Melekisitekiu ai ya'ma Libaihi li gehesaguti huto hu emi'ehina bouba ya'ma Abalahahi ana'ina'a silaga'i nayahi su hola hola higo ni'inaguti ya'ma moneko moneko'i li'ehina. Ya huloto'a Hu'mau lu eto'ehina nasana le'mo hetofa higo li keheli'ehina bo Abalahahi ya'ma lusa gito molo eto'ehina. <sup>7</sup> To mineme tite nehana'a enali limite mine'ahanamagihi lusa gi epelelata nehana'mu yamofiji enebe ligi'ahana. <sup>8</sup> Mone kegi'a ya'ma kuguhi koyo emilata nehana bona'i enali mineme bite fililana yamagi bona'magihi yogo fe'noha'ani nayahi su hola hola higo ni'inaguti moneko moneko'i lilata nehabe. To mone kegi'a ana nasana moneko moneko li'ehina bo Melekisitekiu ya'ma minoba minoba nohina bo yabe lite mono bukugu fayah keye'ahanamo ni'ibe. <sup>9-10</sup> Yata'a Libai ana kanaguai huto huto mehu'ehinaya, tata'afifi Abalahau nohigo Melekisitekiu fo tumala neha'igo Abalahau yogo fe'nohi li emi'ehina. Ana yupahi Libai tata'afifi gufa'agu ana suhi huto mino'ehina. To ai bon-

atogati yogo fe'nohi nayahi su hola hola higo ni'inaguti ana'ina moneko moneko'i lilata nehana bona'magihi bahalo'anifu nohuto Abalahahi meha'aga nohuto fe'nohi ana'ina ya'ma Melekisitekihi li emi'ehina.

<sup>11</sup> Libaihi yagapana'a enali mamufa gilata foyamofih kaba'alo ya'ma Hu'mau ai'a Moseu keya ka lu'ehina ka'a ya'ma Isilaeli bona'i epi'ehinaya anamofih mamufa gilata nehana bomagi enali kapo bili'ahana yanauba buto i segito minaluta nasana li huto hitita alisha'a lokiya fi emilata bo mone fato'mofih Melekisitekihi li nupa hi'ahanaguti henabe

luto huto hitine? Yesu huto huloto ai'a Alonihi babeyafa suhi huto memino'ehina. Ai Melekisitekihi li nupa hi'ahanaguti oto huto hu'ehinamo ni'ibe. <sup>12</sup> Ya'ma mamufa gilata foya li'ahana yamofih tafa'a enele'mo kosaba'i huto mone li huto hulenogo ana tafa'amofih ka'a keya ka lu'ehina'a ana suhi huto topa nehenogo fato'mofih kosaba ka mone huto hilina'mu yabe. <sup>13</sup> To keya ka lu'ehina kauba Sipi Botimofitoga buto lilago ai lokiya fi emilata nehana sipi mono nonugu foyamofih ya'ma Libaihi tata'agitoga li epele'ahana enali li nupa hi'ahanaguti huto mehu'ehina. Sipi Botiu ya'ma li nupa moneguti huto hu'ehina ya'ma ana li nupa hi'ahanaguti moneuba mamufa gilata sipi mono nonugu foya'a lilata menohina ni'ibe. <sup>14</sup> Sipi Boti ai koyapa bo Yutaha naga'aluguti huto hu'ehina yamofih akeheli su hoto keheli'ohune. To Yutaha naga'magi enali mamufa gi emilata foya lilabe luto ya'ma Moseu fayahi koyoto melu'ehinamo

ni'ibe.

*Yesu Meleksitekihi babeyafalo hu'ehinamofifi ka'a*

<sup>15</sup> To mone hiti anokehelune. Mamufa gilatamofifi yuhufa hapa'a mone fato'na ma huto hu'ehibe. Mamufa gilata bo mone Yesu ai'a Meleksitekihi babeyafa suhi huto huto hu'ehina.

<sup>16</sup> Ai'a gufatu huto hu'ehibe lite ka'a li melete li'ahana to lu laga hi'ahana hiti ya'ma ana babeyafalo mamufa gilata bo lolo mehu'ehibe. Ai mino lito buse'na mehi emitu amuya'a hiti mamufa gilata bo mino'ehina ni'ibe. <sup>17</sup> Ai kumu mono bukugu ka'a ma lite fayah keye'ahanamo ni'ibe: *Kai ya'ma Meleksitekihi babeyafa huto mamufa gi emilata bo nagaluguti huto hilata minomo buto foto'i moloto minalane*, lite keye'ahana yabe. <sup>18</sup> Ya hu'ehina'mu ya'ma lu laga hite li'ahana kaga koyapa'i li'ahanamofifi amuya'a meni'inalo legeya'a mone huto mehu'ehina yabe lite le'mo kosaba hi'ahana. <sup>19</sup> Moseu keya ka lu'ehina kauba buto li hetofa hinogo minaluta nasana li huto holito mebu'ehina. To yanamofifi be liginogo fifa ilatana kosabaluguti manuhi epilatanamofifi lamana'a li huto hu'ehina yauba manuhi limigo Hu'mamofifi okaba'aga lebato bulata nohune.

<sup>20</sup> To ka mone hiti ma ni'ibe. Kosaba mamufa gilatana yauba Yesutoga huto hu'ehina ya'ma Hu'mau le'mo huto: *Kai mino lito buse mamufa gilata bo nohane*, luto lu moloto emi'ehina. Yata'a kohe tete mamufa gilata hi'ahana bona'i enali li hetofa hite Hu'mau lu molo'ehina ka melise fa'mene mamufa gilata bona'i lolo hite mine'ahana yabe. <sup>21</sup> Kosaba'i ya'ma ule'ale huto

ka lu mololata nasana ifo'aga Yesuhi ai'a mamufa  
gi emilata bo lamana'a lolo huto nohibe. Ai  
fayaha ka'a Hu'mau lu molo emi'ehina ma luto  
ni'ibe:

Sipi Bouba amuya moloto  
lu laga huto lu'ehina ka'a  
ya'ma mehe'milina'mu yabe.  
Kai mamufa gi emilata bo  
minomo buto  
amuya moloto minalatagihe.

<sup>22</sup> Hapa'a ya suhi huto ni'igo Yesu ai'a ya'ma lu  
mu tifisemofiji ka'a legeya'amofiji yafa lapusa'a  
lolo hu'ehina.

<sup>23</sup> To hapa'a mone hiti ni'ibe. Koyapa ma-  
mufa gilata bo enali ya'ma foya molo emite  
lilune'mu filite bi bi nehago yamofiji ni'igi babu  
bomagi lelite bite mine'ahana. <sup>24</sup> Ya hi'ahanaya  
kosaba'i ya'ma Yesu ule'ale huto minoba mi-  
noba huto minose bo nohibe luto mamufa gilata  
foya yamofiji molo etoto oba oba huto nom-  
inabe. <sup>25</sup> Ya hu'ehina'mu minoba minoba huto  
nominana bouba ya'ma kana'amu kana'amu lali  
kumu yabe luto Hu'mamofitoga buka tilata no-  
hinaya ai'a lubuto bise foya Yesuhi foya'amu  
luto Hu'mamofiji bulo bulata nohuta bo bati  
huto lamana'agu lele'mo moloto lili'nagu lele'mo  
hetofa hulata nohibe.

<sup>26</sup> Yesu ya'ma lali'i mamufa gi leto'ehina bo  
sipi'a nohinagi lele'mo bati hulata nohina bo  
nokehelune. Ai pa sose foipana meni'ina ko-  
mopa'a fi fana tago lamana bo ai foipana nasana  
lilata bo enali tegi huto menohibe. Laga huto  
pa solata nohina bo Hu'mau le'mo saga hu'ehigo

kokulumu ifo'alo be ligi su hoto nominana bo minalina'a huto minolago bati huto ni'ibe. <sup>27</sup> Ai ya'ma mamufa gilata bo tafa'a enali tegi huto meni'ibe. Ai foipana'a hiti meni'igo kana'amu kana'amu kohe toto ai'a foipana'amu yabe luto mamufa gi emilatamofhi alahi bona'magihi foipana'animu kuguhi koyo emilata nohinamo ya'ma meni'ibe. Ai'a komopa'a hiti gufa'a hiti ya'ma li hetofa hu etoto kuguhi moneko'i ya'ma koyo emigo buto su ho'ehina. <sup>28</sup> Moseu keya ka lu'ehina ka'alo ya'ma bomagihi komopa'ani mone bati mehu'ehina bo enali mamufa gilata bona'i minalabe luto lu epoloto enele'mo ho ti'ehinaya, Moseu keya ka lu'ehina kamofifi gupisalo ya'ma Hu'mau le'mo amuya moloto lu laga hulata nohina kaga'a yauba ai'a pana'a ya'ma bu segito hetofa huto nominana bo minomo buto mino yatama huto minalina'mu yabe.

## 8

### *Yesu sipi mamufa gilata bo yabe*

<sup>1</sup> Ka noluna yamofifi legeya'a ma luto ni'ibe. Lali'i mamufa gilata bo sipi bo ai ifoga kokulumagu Hu'mamofifi koli'a hiti kefa hisalo maha'aluga yahi lamaga'aga mino moloto nohibe. <sup>2</sup> Ai sipi hetofa mono nohi ni'inaya ya'mamofifi nonugu mono yahusabe lamana'a lali kumu yabe luto Hu'mamofitoga kaga lulata nohina nasanauba mamufa gilata foya lolo nohibe. Mono yahusabemofifi lamana'a bona'magita gi'ohuta ni'igopa Sipi Bouba ai'a li huto hu'ehina ni'ibe.

<sup>3</sup> Le'mo mamufa gi emilata bo asaga'nalog  
enali gomolu nose'na to fato nose'na laita hilata  
nehabe lite kehel i eto hi'ahana. Yana'mu lali  
mamufa gi emilata bo Yesu ai hiti Hu'mamofifi  
lokiya fi emi'ehinalo mino'ehina ya nohibe. <sup>4</sup> To  
metoga Moseu keya ka lu'ehina ka'amofifi ma-  
mufa gilata bona'i enali fa'mene nehanamo  
ni'inaya yata'isi melugu mino'ehina ni'itita ma-  
mufa gilata bo meminatine. <sup>5</sup> Enali foya'ani tafa  
nopofifi babeyafana ya suhi hite anagu lolo hi-  
lata nehabe to legeya'a ya'ma kokulumagu ni'ibe.  
Ana suhi huto Moseu ai mono kamofifi go nohi  
gilube luto nohigo Hu'mau ma luto lu emi'ehina:  
*Keheli'ohubo. Kosagu babeyafa'a kelepi'ohunamo*  
*ana suhi huto ana'ina silaga'i lolo hubo,* luto  
lu eto'ehina yabe. <sup>6</sup> To lu mu tifise'namofifi  
kaga tito ya'ma ai'a lu'ehina kaga sipi'a huto  
ti'ehina yanauba lukesa yafa'a lolo hu etago  
li huto hu'ehinamo ni'inaya go nohi gilina'mu  
ya luto lu eto'ehina ni'inaya yamofifi Yesu ai'a  
Hu'ma hiti bona'i hiti enele'mo hephilube luto  
lu mu tifi'ehina kaga kosaba'i yauba tito ya'ma  
ni'ibe. Ana suhi huto lokiya fi emilata foya ai'a  
lilata nohinamo yamofifi tito enali'ani foya'ani  
be ligi'ehinagi li hetofa huto hilina'mu yamofifi  
kaga lu molo'ehina kosaba'i huto yamofifi heto-  
fana huto hilinagie.

<sup>7</sup> Koyapa'a lu mu tifise kaga mino'ehina  
yamofifi hetofa legeya'a ho'ehinalo ni'itita al-  
ihi mone huto hilibe luto kaga'a huto mehi-  
tine. <sup>8</sup> Ya hu'ehinaya Hu'mau ai ya'ma Yuta  
bona'magi kumu kehelina bebe mesago ka'a ma  
luto lu'ehina ya'ma mono bukugu ma lite fayah

keye'ahanamo ni'ibe:  
 Minoto kana monelugu  
 ya'ma Isilaeli bona'i to Yuta naga'i  
 enali hiti lu mu tifise ka kosaba'i  
 mone li huto hu epilube,  
 yamofiji Sipi Bouba luto lu'ehina ni'ibe.  
<sup>9</sup> Kosaba ka lu molo'ohunamofiji  
 koyapa'i afo'anigihi  
 Iyipi metogati enele'mo alube luto  
 enayato li'ohuna kana'a  
 enali hiti lu mu tifise'namofiji ka'a  
 lu molo epolo'ohunamo meni'ibe.  
 Enali lu mu tifise ka'amofiji  
 komopa'agu le'mo fotogo hite meminago  
 nani'ni bu goloto  
 ahe'mi epolo'ohunamo ni'ibe,  
 Sipi Bouba ai'a ya'ma luto nolibe.  
<sup>10</sup> Koyapa kana'a bulago  
 alih Isilaeli bona'i  
 enali hiti ma luto  
 ka'a lu mu tifilube'mu nohube luto  
 Sipi Bouba lu'ehibe.  
 To nani lu laga huse kaga'ni  
 enegekesagu melenogo'ni minalina'mu yabe.  
 Ya huloto komopa'anigu  
 fayah koyo melenogo minalibe.  
 To nani Hú'ma'anifita lolo huto minalugi  
 enali yagapanan'i ni lolo hite minalanagihe.  
<sup>11</sup> To limite neminana'a lagaso'a  
 to tite neminana'a sipi bona'magi  
 enali nani kumu kehel su hete  
 kehelilanamo ni'inaya,  
 yamofiji bo moneuba bo lalu'afihi to  
 bo moneuba falu'afihi:

Kai mele'isi Sipi Bomofahi hapa'a  
keheli fe lubo, luto ya lu emitō  
iyo iyo huto lu emilina'mu yabe.

<sup>12</sup> Ya hu'ohuna'mu kehelilune'mu nehabe.  
Nani keke'i nolu epoloto enali  
li sibi sibi hi'ahana'ani  
li he'mi epalaluna'mu yabe.  
To foipana'animu aku negekesa mone  
mekeheliluna'mu yabe, luto  
Sipi Bouba ya lu'ehina yabe.

<sup>13</sup> To Hu'mau ai lu mu tifise kaga kos-  
aba'namofi kumu noluto koyapa'i mino'ehina  
kagamofahi tafa lo'ehibe luto lu'ehina. To ana'ina  
tafa loloto fulupa ito yamofahi nesi'a minoto su  
hoto fenene hilina'mu yabe.

## 9

### *Kokulumalugu mono nohi yabe*

<sup>1</sup> Lu mu tifise'namofahi ka'a tafa'agu Sipi Bo-  
mofahi bulo lipi emilata nehana lu laga huse  
kaga ni'ina to mono nohi metoga mino'ehina.  
<sup>2</sup> Yamofahi mono'mofahi go nohi ya'ma ya hite  
gi'ahana. Hasa mone fi laga hi'ahana mone  
okaba'aga mino'ehinamofahi gi'a sipi bebe sose'i  
yabe lite li'ahana. Anagu ya'ma libi'mo yatamalo  
to hita gigusa'a hiti mino'ehina to hisamofahi  
gupisa'alo ya'ma Hu'mamofahi bulo mele'ahana  
beleti nose'na lapelugu mino'ehina. <sup>3</sup> To buto  
komopa'agu mone kesige katatu fi laga hago  
mino'ehina gi'a bebe sosemofahi legeya'a eto  
huse'i yabe lite mino'ehina. <sup>4</sup> Anagu ya'ma  
tu'a hiti nasanamofahi lokiya fi emilata hita

mone golitu lolo hi'ahana ya'ma mino'ehina. To bokisi golitu lolo hi ete'ahana ya'ma lu mu tifise'namofiji kaga'a ni'ina. Ya'ma bokisi anagu mana nose'na kokulumaguti limi'ehina nose'na mone'a somogu mino'ehina. Ana somomo golitu lolo hi'ahana anagu ya'ma mana nose'na mino'ehina. Ana bokisigu Alonihi fatusa bu'a hiti fi ho tilago mino'ehina. To lapelegusa efahi loemo ya'ma keya ka analo fayahi keye malago mino'ehina.<sup>5</sup> Ifo'alo ya'ma Hu'mamofiji fana mehena'amofiji babeyafa'alo kene'i loemale'i etali foipana okala hu epololata hitalo ya'ma koke'na'atititu lite ifi telete mine'aha'ina. Yamofiji ka'a yatama hu lalibe luto asaga'na ana'ina'mu molo emitu lu su mehaluna'mu yabe.

<sup>6</sup> Ana'ina ya suhi hite lolo hite mele'ahago ni'igo nohi buga'aga anagu tite ya'ma mamufa gi emilata bona'i enali kana'amu kana'amu tite foya'ani lite minelata hi'ahana. <sup>7</sup> Nohi komopa'a monelugu ya'ma mamufa gilata bona'magihi sipi bo'ani ai'ago kufu mone'amofiji yupahi nohi komopa'agu tito mino'ehina. Ya huloto meme yagamagihi bulumaka yagamagihi golahi li hekigo ligo tito yata'a ai'a foipana'a hiti to alihia bona'magihi foipana sibigopa mino'ehina li'ahanamofiji mekeheli'ahana yana'mu yabe luto hitalo ana golahi fepa kopa i'ehina. <sup>8</sup> Ana'ina yanamofiji hapa'a ya'ma fana meha'a hiti Sikalafu'uba ma luto lu nolimibe: Nohi hasa luga'a ya'ma fa'mene ni'inogo bebe sose mono nonugu buto fololata nohuta kapo hokolo hu su meho'ehinamo ni'ibe. <sup>9</sup> To ya'ma hasamofiji okaba'aga mino'ehina ya'ma kanalo metoga

nominota'a nasana babeyafa'a huto ni'ibe. Yamofahi hapa'a kehelilotiti ya'ma bebe sose mono nonugu gomolu nose'na kuguhi keyete laita hilata nehana yanauba Hu'mamofahi bulo lipi emilata nehanamagihi komopa'ani le'mo fotogo mehilibe luto nokehelune. <sup>10</sup> Yanauba enugufa'aga li molo'ehina ka'ago ya'ma ni'ibe. Lu laga huse kagamu'i nose'na fato fato'i to bai nagami'i nenanaya to enugufa'ani mono nagami'i okala hilata nehana yamofahi kaga'a ni'ibe. Ya'ma Hu'mamofahi ka'alo huto higo bona'magi mege'i melete bite nehinogo alisha'a Kilisitou ana'ina le'mo bebe salina kana'a huto hilibe.

<sup>11</sup> Ya hu'ehinaya Kilisitou ai'a ya'ma ana'ina legeya'a li huto huto lu molo'ehina yamofahi mamufa gilata nehana bona'i sipi mono bo'ani huto hu'ehina. To Kilisitou ya'ma kokulumagu mono nonugu lili'na lito mino'ehinauba tafa go nohi be ligi'ehina to ya'ma ifo'alo mono nohi mone legeya'a lamana'a enayatu meg'i'ahana to ma metoga meni'inamofahi babeyafalo ni'inaya mino'ehinamo ni'ibe. <sup>12</sup> Kilisitou ya'ma meme yaga bulumaka yagamagihi golapo li'ehina ni'igopa ai'a golaha'a hiti buto bebe sose go nonugu tito ya'ma nohi hasagu tilina kana moneko'i tito mina fi letoto lubuto bito mino kosaba huse'i limi'ehina yamofahi minomo buto minaluta'mu yabe. <sup>13</sup> To mememagihi bulumakamagihi golahi to bulumaka ikele'amofahi gufalo logouba lo'ehina lahi folo epalalina nasana'mu bonatoga fepa fepa iloto enugufaga folo epalago bi fele afele tigo

mine'ahana enali Hu'mamofihu bulo enele'mo bati hi'ahana. <sup>14</sup> Ya hu'ehinaya Kilisitou ai ya'ma minoba minoba Meha'auba fi hele hu etago ai komopa'a hiti gufa'a hiti bati huto mino'ehina yamofihu Hu'mamofitoga hetofa mamufa gi emi'ehina. Ya hu'ehina'mu Kilisitohi golaha'auba komopatilo i kolo'ehinamofihu okala huto foipa foya he'mi letoto lele'mo bebe solenogo mino kosaba huse bo, Hu'ma aitoga agoya hu emitu foya'a lilata nohune.

<sup>15</sup> Ya hu'ehina'mu Kilisitou ai'a ya huloto lu mu tifisemofihu ka'a tafa'a yanagu bona'i mine'ahana foipana li huto hi'ahana yaguti li kele li letalube luto fili'ehinamo ni'ibe. Ya hu'ehina'mu bona'i yata'a lu mu tifise'na kagalugu mine'ahana Kilisitou foipanaguti gulu ho epolo'ehina yabe, luto fili'ehina. Tonofilito Hu'mau elesa molo epi'ehina bona'i enali minoba minoba husemofihu kokulumagu yogo fe'nohi lilabe luto lusa gi epalalina'mu yabe. Ya'ma bati hite lilabe luto Hu'ma hiti bona'i hiti enele'mo hepilotu lu mu tifise ka'a kosaba'i li huto huto molo leto'ehinamo ni'ibe.

<sup>16</sup> Yogo fe'nopofihu kapo'a ma huto ni'ibe. Afo'afu fili'ehinamofihu hapa'a huto lu yege holenogo yogo fe'nopofihu ka'auba legeya'a henilina'mu yabe. <sup>17</sup> Ana bona'i kosaba'i bu hiti nohinogo yogo fe'noho nasanamofihu ka'a ya'ma fa'menego minalina'mu yabe. Fililenogo yamofihu legeya'a huto hilina'mu yabe. <sup>18</sup> Ya hu'ehina'mu ya'ma lu mu tifisemofihu ka'atafanauba yagamagihi golahi he nekigo bu molo'ehinago bati huto mino'ehinamo ni'ibe.

<sup>19</sup> Yata'a Moseu keya kamofahi fayahi koyo'ehina asaga kaga lataha'asiloko leka soto lu yege hoto bona'i lu epigo kehel'i'ahana. To lu epi su holoto bulumaka ikele'amagihi golahi to mono nagami'i hiti li sibi sibi huto segi osahi mone tup'a'alo to sipisipi yagamagihi oka'ani saf'a'na moloto sa giloto yamofitu nagami iloto lepe tepe huto keya ka ni'inalo to silaga boana'i nehanalo folo epolo'ehina. <sup>20</sup> Ya huto'a ma luto lu epilata hu'ehina: *Hu'mau lu mu tifse'namofahi ka'a lu laga hu lepolo'ehina yamofahi golaha'auba lenele'mo bati hinogo lama'nakagalo kehelite mege'i malalo*, luto ligo kehelite mine'ahana yabe. <sup>21</sup> To Moseu ya'ma bebe sose go nohi ni'ina to anagu foyamofahi nasana asaga'i ni'ina yalo ya'ma golaha'a fepa kopa ito su ho'ehina. <sup>22</sup> Ya hu'ehina'mu ya'ma keya ka lu'ehina ka'alo ana'ina silagaloga mememagihi bulumakamagihi golaha'anitu okala hulata nohinamo ni'ibe. Golahi memalalana'a ni'inogo ya'ma bona'magihi foipana'ani li kele lilata'a mone meni'ibe.

*Kilisitohi golaha'auba foipanati kele lilata no-hina*

<sup>23</sup> Ma metoga mono nasana silaga'namofahi hapa'a ya kokulumagu ni'inamofahi babeyafa'a fa'menena golaha'atu nagami ite nokala hite li gulu gulu lilabe luto keya ka ya lu'ehinamo ni'ibe. To kokulumagu nasana lamana'auba ai'a ya'ma lokiya fi emilata nasana eto huto mino'ehina yanauba nagami ito hapa'a hetofana lolo hilibe luto le'mo hokolo hilinamofahi kapo'a

moneko'isi ni'ibe. <sup>24</sup> Ya hu'ehina'mu Kilisitou ai bona'magihi enayatu gi'ahana mono nonugu to lamana'amofahi babeyafa'a mino'ehina anagu buto meti'ehibe. Ai kokulumagu tiloto Hu'mamofahi bulo lali kumu yabe luto nehetito lele'mo hetofa hilina foya'a ya'ma lilata nohibe. <sup>25</sup> To Yuta bona'magihi sipi mamufa gilata boubu kufu'amu kufu'amu hetofa kana'a moneko yupasigo bebe sose nonugu tito meme yaga mone'mofahi golahi lito tilata nohibe. Ya nohuto ai'a golaha'atugopa fa'mene nasanamofahi golaha'a liloto tilata hu'ehinaya Kilisitou ai'a gufa'a komopa'a ya'ma lali kumu yabe luto he'milube'mu kana babu yupahi meti'ehina ni'ibe. <sup>26</sup> Yana'mu Kilisitou ai gufa'a komopa'a kana'amu kana'amu he'mi leto'ehina ni'itita ai me'mofahi lolo hu'ehina kana'a huto hu'ehinaloti ema'aga keke'i luse'i lito filito buba buba huto nesi'a meminotita'mu yabe. Ai'a ya'ma ya suhi hu emitu Hu'mau molo'ehina kana'a su halube'mu nohinogo kana'a moneko'i ai'a gufa'a komopa'a nehe'mito foipanati su halibe luto huto hu'ehinamo ya'ma su ho lamana hibe. <sup>27</sup> Silaga bona'magita kana'a moneko'i fililune luto to yanamofahi ifo'alo Hu'mau nohinalo ai'a foipanati'mu ka foya lilube luto lu leto'ehinamo ni'ibe. <sup>28</sup> Kilisitou ai ana huto kana moneko'i silaga bona'magihi foipana'ani ai gupisalo tigo he'mu kito Hu'mamofahi kuguhi koyo emiloto fili'ehina. Aku'i foipa nasana li su halibe luto ni'igopa aimofahi geba hite fifa ite minelata nehana bona'i Kilisitou enubuto bise foya aliha'a li su haluna'mu yabe luto aku'i kokulumaluguti

limito huto hilube'mu hibe.

## 10

<sup>1</sup> Yuta bona'magihi keya ka ya'ma legeya'a alih huto hilinamofhi babeyafa'a mone'a anasi ni'ibe. Legeya'a lamana'a meni'ibe. Ya hu'ehina mamufa gilata bona'i enali keya ka lu'ehina ka'alo kufu'amu kufu'amu lokiya fi emi'ahana ana suhi hilenogo hena keya ka koyo'ehinamofhi kugupouba Hu'mamofhi bulo bilata nehana bona'i ya'ma mone'na lusiga luto enele'mo bati hulata nohibe? Ya huto meni'ibe. <sup>2</sup> Hu'mamofhi lipi emilata nehana bona'i ya'ma mone'na komopa'ani li gulu ligo lu epolo'ehinalo ni'itita komopa'anigu foipana'ani meni'igo minatita'mu yabe to asaga kuguhi lokiya fi emilata'na ya'ma he'mitita'mu yabe. <sup>3</sup> Ya hu'ehinaya kuguhi koyolata'namofhi ya'ma kufu'amu kufu'amu nekayago foipana'animu aku'i beto hite kehelilata nehabe. <sup>4</sup> Kuguhi koyolatana'mu to lokiya fi emilatana'mu mememagihi to bulumakamagihi golahi heki'ahana yanauba bona'magihi foipana'ani nokala hu epalalina'a to he'milina'a mone meni'ibe.

<sup>5</sup> Ya hu'ehina'mu ya'ma Kilisitou melugu ma'asi limilube'mu nohuto afo'afifi lu emi'ehina ka'a ya'ma mono bukugu ma lite fayahi keye'ahanamo ni'ibe:

Kuguhi koyo epilata  
 ya'ma fato fato'mofi kumu  
 lagaka mekebesigo  
 ananamofhi kibita mehu'ehina.  
 Ya hu'ahataya,  
 nugufa lolo huto

le'mo hetofa hu'ahatamo ni'ibe.  
<sup>6</sup> Fato fato yagatu hete hosa hite  
 kuguhi keyete lokiya fi emi'ahana  
 yamofahi bu goto  
 laga'ni menebesibe luto lulata hu'ehina.  
 Foipana'ani he'mi su halibe luto  
 kuguhi keyelata nehago  
 mone kegelo mebilata nohane.  
<sup>7</sup> Ya hulago  
 nani ma luto lu'ohunamo ni'ibe:  
 O Hu'mao, kehelibo.  
 Kai lilata'a malalata'a hilube luto  
 kegeba huto nominobe.  
 Keya ka lu'ehina kamofahi fayaha'agu  
 nani kumu kaga koyo'ehinalo  
 ya huto lilube luto nohube.

<sup>8</sup> Kohe toto luto lu'ehina: *Yagamofahi kuguhi koyo emilata nehana to lokiya fi emilata nehana hiti fato fato'mofi kumu kegelo mebi'ahane, luto to fato fato yagatu hete laita hilete foipana'ani su halibe lite ana mamufa efaha hitalo gilata hi'ahana ya'ma ana suko huto bati mehu'ehinamo ni'ibe luto lagaka mekebesibe luto*, yata'a ka lu'ehinamo ni'igo ya'ma anamofahi mamufa gilata foya ya'ma keya ka lu laga huto lu'ehina kaga'alo keyelata hi'ahanaya. <sup>9</sup> To aliha'a Kilisitou molo emitō ma luto lu'ehina: *O Hu'mao, kehelibo. Kai lilata'a malalata'a hilube luto kegeba huto nominobe*, luto lu'ehina. Ni'inaya asaga mamufa gilatanamofahi tafa'a fato fato'i ni'igo Hu'mau li he'mito Kilisitohi ka'a ai'a keheli bati huloto Kilisitohi gufa'a mamufa gilata nohina yamofahi li molo'ehigo ya'ma kosaba'i li huto

hu'ehina. <sup>10</sup> Ya hu'ehina'mu Hu'mamofahi ka'alo Yesu Kilisito kehelito gufa'auba kana'a moneko kanasigo mamufa gigo lali asaga'i foipanati li he'mi letoto komopati le'mo eto higo nohuta'a ya'ma aku'i mamufa ai'a gilina'mu yabe.

<sup>11</sup> Yuta bona'magihi mamufa gi epololata asaga bona'magitoga enali kana'amu kana'amu foya'ani lite ho tilet nehite kuguhi keyete lokiya fi emiba emiba hite minelata hi'ahana ni'inaya asaga yupahi ya nasanauba ya'ma bona'magihi foipana'ani nokala hu epalalina suhi mehibe. <sup>12</sup> Kilisitou ya'ma foipanati su halibe luto ai'a golaha'atu mamufa gigo asu ho'ehibe. Yanamofahi gupisalo aku'i mamufa megilina'mu yabe. To ya huloto Hu'mamofahi yahi lamaga'aga mino moloto mino'ehina. <sup>13</sup> Yalo'i Hu'mamofahi fateha'a enele'mo lolo huto gigusa'atu iti kalube luto enegeba huto nohibe. <sup>14</sup> Ya huto komopati li gulu gulu hinogo lele'mo eto hulata kapolo bulata nohutamofahi mamufa moneko'i giloto lele'mo fotogo hulata kapolo malago asu ho'ehinamo ni'ibe.

<sup>15</sup> Ya ni'inaya hetofa Sikalafu'uba ai'a hiti lu huto huto lu limi'ehinamo ni'ibe. Ai ka'a mono bukugu hapi fito ma luto ni'ibe:

<sup>16</sup> Alihi kanalo lu mu tifise ka'a  
li huto hu lepalalube luto  
Sipi Bouba ma luto nolibe:  
Nani lu laga huto noluna ka  
ya'ma komopatinigu molo lepelenogo'ni  
liminogo  
komopatini lenegekesagu fayah keyenogo'ni  
minalinamo ni'ibe.

<sup>17</sup> Ya luto luloto analo molo emitō ma luto mone hiti lu'ehina: *Foipana'ani'mu to laga mehina nasana'ani'mu aku'i kana'amu kana'amu meke-helilube'mu nohubē*, luto lu'ehina. <sup>18</sup> Ya luto nohigo foipana'ani lu he'mi epolo'ehigo ana foipana su holago ana'ina laga mehinanamofi kumu mamufa gilatana ya'ma ana suko huto su ho'ehibe.

### *Hu'mamofīhi bulu nehetilune*

<sup>19</sup> Nalalu'nigita, ya hu'ehina'mu Yesuhi golaha'auba bebe sose nonugu Hu'mau nominanamofīhi kafe sigi letago lali nohinagu tiluta'mu komopatigu lelesa melinogo ya'ma tilune. <sup>20</sup> Sipi mono nopofigi hasalo li hokolo huto ya'ma ai'a gufa'a legi huto mino'ehinaya yanauba hekini lo'ehina katamofīhi li beyaga i luga luga huto Hu'mamofīhi maha'aga bulatanamofīhi mino kosaba kapo amuya moloto minolata nasana ai'a le'mo lamana hu leto'ehina. <sup>21</sup> Ai tiloto mamufa gilata bomofito sipi kibina bo lolo huto Hu'mamofīhi yagapanā'a lali'i latahatilo kaba boti nohibe. <sup>22</sup> Ya hu'ehina'mu komopati lusiga luto emiloto kehelī ule'ale hinogo komopatigu okala huto foipana nasana'mu lekesa yigi yigi mehuse ya'ma ai'a golaha'atu lali'i okala hu su hoto folo letago komopati babahi higo to lugufati ya'ma hetofa nagami'i bu okaba'a suhi huto lolo hu'ehinalo nagamitu ko letelenogo minoto Hu'mamofīhi bulu nehetilune. <sup>23</sup> Ya nohinogo Hu'mau ka'a lu molo'ehigo ana mololata bo aitoga buto lifita ito to fifa ito lulata nohuta ya'ma le'mo hetofa huto kaba huto mino'ehina

yabe. <sup>24</sup> Komopatitu lemehi emitō komopati ai eminogo ai eminogo nohuto lili'nalo ai he'menogo ai he'menogo huto minalune luto komopati le'mo bati huse'namofifi kapo'mu sa sa huto minalune. <sup>25</sup> Ya nohutoti mono kumu li gehesa hulatanagu luga'amagi menehetise amanapa hite neminana'a nehabe. Ya hilata nehana enali suhi mehuse kana'amu kana'amu Sipi Bouba alina kana'a lebato huto nohinago yamofi kumu kehelito minoto enele'mo hetofa huto amuya moloto minalune.

<sup>26</sup> To lali Hu'mamofifi ka legeya'a yauba komopatigu fi besa loleno go legekesa kehe-lito foipana aku'i lilune luto nolunogo foipanati'mu ya'ma kehelito le'mo eto huto lino-goti foipanati su halibe luto mamufa gilata nasana mone meni'ibe. <sup>27</sup> Ya huto ni'igopa yamofifi foipana'a babu luto ketanamofi kumu ligiki nebinogo geba huto minalune. Logo gu-luya meha'auba Hu'mamofifi luba li emilata nehana bona'i ya'ma akafu'i hen i epalalina'mu yabe. <sup>28</sup> To Moseu keya ka lu'ehina ka'alo pe-le-sa ite hauta halana bona'i ya'ma kene'i loe-male'ifi loegi monegimagifi enali ka'ani lilago enali hapa hapa'ani foipana'ani huto hulago keke'i meli epelese mele'isi eba eba hite enoho fili'ahana yabe. <sup>29</sup> Yanauba keta hu tegi huto ni'inaya, bo moneubafi moneuba Hu'mamofifi pana'amofitoga megesa hu emilina to mino hepito mu tifise'namofifi kaga'alo golahi lepe tepe hu'ehina nasanauba komopa'a le'mo fana to'ehina yamofifi ai bu goto fa'mene lolo huto no-hilina bomofifi Hu'mau hena hu etalina ni'ibe?

To lehe'mose afo'afu Sikalafu'i yamofahi le'mo laba hilina ya'ma bomofahi Hu'mau hena hu etalina ni'ibe lite lenekesa nekehelibe. Ai le'mo sibina hu'ehinana'a sipi huto to keta'a hiti lilina'mu yabe. <sup>30</sup> Moneko'uba lili'na ka ma luto lu'ehina: *Foipana epilata nasana ya'ma nani foya'nimofahi mone kegi'a beletoga ni'ibe.* Pa solatana ya'ma nani'ni pa salube, luto lu'ehina. To mone hiti: *Sipi Bo ai yagapana'a enalitoga ka foya lito guna molo epalalube'mu nohibe,* luto lu'ehina bo ai hapa'a kehelilata nohune. <sup>31</sup> Yalo'i kana'a sipi yupahi minoba minoba huse bo Hu'mamofahi yanugu fololata nohuta ya'ma koli'a hiti nasana felana ni'ibe.

<sup>32</sup> Lenali koyapa'i ana'ina lolo hite mine'ahanamofahiaku'i kehelilo. Kana'a ya'ma yupahi komopatinigu Hu'mamofahi fana meha'auba fi fana to lepelenogo keke'i luse'namofahi komopa'agu minete keta'a hiti foya lite amuya melete lite mine'ahana. <sup>33</sup> To kana'a loemo lenali lenagabu gise'nauba lenugupisalo tilago bona'magihi enubulo enumu fili enama fili hite kalana'i molo lepalago lenali fa'mene mine'ahana. To kana mone'agu ya'ma lenigibo lenalalutinighi ana'ina ya suhi lolo nehi epalago hite molo emite keke'i li epele'ahana. <sup>34</sup> Lenali lenigibo lenalalutinighi naga nonugu nehago enali kumu yabe lite komopatinigu ekafa'i ho'ehinamo ni'ibe. To asaga fe'nohatini bauna fite lilago ya'ma komopatinimofahi fe'nohi lamana'a amuya moloto minomo buse'namofahi molo'ohune lite kehelilete lenegelo bilata hi'ahanamo ni'ibe.

<sup>35</sup> To yatai ya'ma Hu'mamofitoga lenifita ilata nasana mehe'milo. Ya nasanauba minoto alilha'a mina'a sipi'a li huto hu lepalalina'mu yabe. <sup>36</sup> Yana'mu lenali keta'a hiti'namofifi komopa'agu mino fulu hite minelenogo Hu'mau lilina malalina ka'a kehelite nehinogo ana'ina le'mo babahi huse'namofifi legeya'a lilabe. <sup>37</sup> Ya hu'ehina'mu mono bukugu fayahi mone ma lite keye'ahanamo ni'ibe:

Kana'a hupamone ni'ibe.

Yamofifi su nehenogo  
alube'mu nohinagihe.

Alibe lite li'ahanamo  
ya'ma mino yatama mehuse  
mele'isi nehetilina'mu yabe.

<sup>38</sup> Bona'ni lamana hi'ahanamagi  
enali keheli ule'ale hite minete  
mino kosaba'i lilete minoba minoba hilabe.  
To luga'amagi enali he'mite i behe hite  
bilana'a ya'ma enali kumu kehelugo  
laga'ni menebesilina'mu negelo mebilube.

<sup>39</sup> To lali amuya memolose kosele kasele'i hoto minaluta'a to i behe huto tafa kapomofifi nasana lolo mehiluta'mu yabe. Lali ya'ma kehelito amuya moloto lemehi emitto lubuto bila-tanamofifi nasana ya'ma lilune.

## 11

### *Keheli ule'ale huse hapa'a*

<sup>1</sup> Keheli ule'ale husemofifi hapa'a ma luto ni'ibe. Ana'ina le'mo batu nohu letana yana'mugopa keheliya ito fifa ito minoto yanamofifi geba hulatana to bu

mego'ehilutana'mu komopatitu le'mo pili koto  
lito nohilune. <sup>2</sup> Mono bona'i koyapa'i minete ho  
tite hi'ahanamagi keheli ule'ale hite minelata  
hi'ahana'a yamofiji Hu'mau bu enagago laga  
hulata hu'ehina yabe.

<sup>3</sup> Koyapa'i ya'ma Hu'mamofiji ka'alo metoga  
nasana kokulumagu nasana hiti bu golata nohuta  
nasana huto hu'ehinamo yamofiji bu megose  
suhi hinaguti huto hu'ehinamo ni'ibe, luto keheli  
ule'ale huto minototi keheliya ito keheli'ohune.

<sup>4</sup> Ebeliu keheli ule'ale huse'na'a hiti amuya  
moloto ni'inalo Hu'mamofiji kuguhi koyo  
emi'ehinamofiji Hu'mau bu gago bati hu'ehina.  
Kenihi mone'na ya'ma bu go sibina hu'ehina.  
Keheli ule'ale huse'na ya'ma Hu'mau Ebelihi bu  
gago foipana'a meminago minoto kuguhi koyo  
emilago li'ehina yamofiji hapa 'a analoti li huto  
hu'ehina. To keheli ule'ale huto minana'mu luto  
lali kehelutogo Ebeliu fili'ehinaya sibigopa ka'a  
lu limilata nohibe luto kehelilune.

<sup>5</sup> Inokiu ai keheli ule'ale hulata bo minago  
Hu'mau ai bu go bati huloto filise'na ya'ma  
aitoga huto mehilibe luto mino kosaba huse  
gufa hiti le'moto kokulumagu ti'ehina. Ya hu  
eto'ehina'mu ya'ma bona'magi ai kumu lite sa sa  
hite be mege'ahana. To meti'ehigo ai hapa'amu  
ya'ma Hu'mau Inokihi bu go laga hu'ehinamo  
ni'ibe lite mono bukugu fayahi keye'ahanamo  
ni'ibe. <sup>6</sup> Keheli ule'ale huse'nati meeminenogo  
nehinogoti Hu'mau bu goto fokehi melilibi.  
Hu'ma ai'a nohibe luto yamofiji keheli ule'ale  
huto to ai hapa'amu amuya melete sa sa hilana

bona'magi ya'ma mina'a limilibe luto komopatu keheliya ito ai maha'aluga buse'na ni'ibe.

<sup>7</sup> To Noa ai keheli ule'ale huse'na'a hiti bo mino'ehina Hu'mau alahi lipoti molo emilago ekesa kehelito kohe toto ka'a ekesa lito lu emigo Noau ya'ma kagalo keheli amuya moloto yagapana'a hiti enubuto bito minalabe luto ya'ma luloto nagamilugu boti sipi'a lolo hu'ehina. Ya huloto Noau Hu'mamofitoga agoya hu emitio keheli ule'ale hilata yana'mu Hu'mau lamana bo nohane luto lu molo'ehina yauba ya'ma melugu bona'i foipana li'ahana'amagihi enifisa i'ehina suhi huto mino'ehibe.

<sup>8</sup> Abalahau keheli ule'ale huse bo mino'ehina Hu'mau kehe ito ai me'i mone enali felisa fe'nohi minalibe luto kele'mo bati hilugi kai mekagati he'milotu mone kegi'a buto minalane luto kaga lu moloto lu emigo keheli emitio me'i magafi hiya'agafi lu'ehina ya'ma mekehelise fa'mene agoya hu emitio bu'ehina yabe.

<sup>9</sup> Keheli ule'ale huse bo minana'mu luto me'i bu go molo eto'ehina yalo buto nehetiloto fa'mene minoto ka'i logo lili bo suhi huto yege nohi gito anagu koto mino'ehina. To Isaka to Yakopu etali hiti analo ya'ma Hu'mau lu molo epolo'ehina nasana'a lolo hite minete anamofahi gupisalo mine'aha'ina. <sup>10</sup> Abalahau ai keheli ule'ale huse'namofahi lapusa'a hiti nohi hepa'i mone minoba minoba huse'i ya'ma Hu'mau minalinamofahi nasana'a lolo hu moloto li huto hu'ehina yanasmuko geba huto mino'ehina.

<sup>11</sup> Selau ai namopa litana'i nohigo Abalahau ai keheli ule'ale hulata bo minoto oyafa loloto yagapana'a ketalina kana'a su hago amuya

emigo yagapana'a hiti hu'ehina. Hu'mau ya'ma bulo lu emilago legeya'a huto hulata nohina bouba lu huto hibe luto kehel i amuya moloto ya suhi lolo hu'ehina yabe. <sup>12</sup> To yamofahi ya'ma bona'i monekoluguti pulu tilatanamofahi amuya'a su ho'ehinalo aitogati yagapana'a pulu ti'ahana enali kokulumatoga sonofi'i mineme bite ete samahi netina yanamofahi babeyafalo to hege nagami beleha'aga kehe'i ni'ina ya suhi huto bona'magita leka so su mehaluta Abalahahi tata'amagihi legegeto huto helite bi'ahana.

<sup>13</sup> Bona'i ya hana'amagi kehel i ule'ale hite minete filite bi'ahana'a enali Hu'mau lu molo'ehinamofahi ana'ina enele'mo keta mehuse'namofahi legeya'a ya'ma mele'isi meli'ahana, fa'mene foto'i ni'igo be gelete ka'a lite kehelite li pili kete mine'ahana. Ya hite minete, hapa'ani ma lite kehel i'ahana: Lali fa'mene metoga minoto bonoho bona to ka'i logo lili bona tegi huto nohune lite kehel i'ahana. <sup>14</sup> Kaga'a ya'ma lite lilata nehana bona'magi koto hep a'ani mone li huto hilune'mu komopa'anitu kehelite mine'ahana yamofahi mino kosaba huse hep a'i huto hilina'a geba nehabe. <sup>15</sup> Ya hilete enali nohi hep a'ani to me'ani he'mi'ahana yana'mu eniginaga figo mone kehelite ya mehi'ahana. Yana'mu epesigo ni'itita i behe hite fa'mene atine. <sup>16</sup> Enali ya'ma nohi hep a'i lamana'a mone lilune'mu yabe lite ya nasana'muko geba hite kehel i'ahana. Kokulumalugu yamofi kumuko kehel i amuya mele'ahana. Ya hu'ehina'mu enali Hu'ma ai kumu Hu'matiga yabe lite lago kehelito megesa

hu meepilata nohibe. Ya'ma hena'mube? Ai'a nohi hepa'i mone li huto huto enele'mo nupa hu'ehina'mu yabe.

<sup>17</sup> To Hu'mau Abalahahi fi taga hu etago keheli ule'ale hulata bo nohibe luto Isakahli lepa ito kuguhi koyo emilube luto keheligo amuya molo'ehina. Ai'a yagapana'amu Hu'mau lu molo eto'ehina kaga ya'ma li pili koto keheli'ehina bo nohinaya pana'a moneko'i ya'ma lepa ito kuguhi kayalube luto keheli moneko hu'ehina. <sup>18</sup> To Hu'mau ka'a ma luto lu emi'ehina: *Isakatogati panana'a huto pulu tite bite minalana'mu yabe.* <sup>19</sup> Abalahau ai Isaka kumu ma luto keheli'ehina ni'ibe. Hu'mau ai Isakahli fililinaguti le'mo ho tilibe, luto yamofiji keheli amuya moloto li'ehina bo to yamofiji fili'ehinaguti le'mo behe hu'ehina ya suhi lolo hibe luto keya'i molo etoto lu'ehina.

<sup>20</sup> Isakau ai keheli ule'ale hulata bo mino'ehina'mu luto ana'ina alihia huto hilinamofiji ka'a Yakopuhi to Isauhi kaga lu moloto lu etimoto lusa gi etoto'ehina yabe.

<sup>21</sup> Yakopu ya'ma keheli ule'ale huse bo nohibe luto fililube'mu nohuto Yosefehe pana'a loemo lusa gi etoto'ehina. Ya huloto fatusalo lito ho tito Hu'mamofiji lipi emitio fokehi li'ehina.

<sup>22</sup> Yosefeu ai keheli ule'ale huse bo nohibe luto fililina kana'a tupa nohigo Isilaeli bona'i enali minete Iyipi metoga he'mite bilana'mu yabe luto kehelito ai'a felisa'amu kohe toto lu laga huto ma luto lu epi'ehina: Bilune'mu nehitemo ya'ma nani'ni felisa'ni hiti lite bilo.

<sup>23</sup> Moseu huto hulago ito'afugo afo'afugo ya'ma keheli ule'ale hilata alobole neha'ibe lite yaga-

pana'atiti'mu pana'i hetofanamo ni'ibe lite bu go laga hilete Iyipi bo Felo, gihihi bo ai lagaso pana'i asaga'i kele lilo, luto kaga moloto lina'mu yabe lite yamofifi etali etelesa meligo keheli he'mi'aha'ina. Ya nehitte ikahi loebe monebe nobigo le'mo fala kite le'mo melete mine'aha'ina yabe.

<sup>24</sup> To Moseu keheli ule'ale huto minoto hofa tago Felohi pa'amofifi pana'a yabe lite lilata nehago Moseu o'e luto ya'ma nani ai pana'a yatai menohube luto lu'ehina yabe. <sup>25</sup> To foipana nasanamofifi laga'a hiti tupa kana mino laba huto meminose'namofifi ya'ma he'miloto Hu'mamofifi bona naga'a enali hiti keke luse'namofifi gupisa'alo nehago yalo ai hiti molo emito kehelilube luto mino eto huto mino'ehina. <sup>26</sup> Ya huloto Iyipi metogati mone fe'no hiti mina'a sipi ana'ina ya'ma lilina kanamofifi keheligo fa'menena lolo nohigo Hu'mau gulu ho letalibe luto lu molo eto'ehina bo, Mesia kumu yabe lite eniginaga fina'a gupisalo minalube luto yamofifi keheli ule'ale huto legeya'a lolo hu'ehina. Yamofifi minomo titi mina'a huto hilina'a lilube luto ana kaga'mu kehelito li pili koto ya suhi hu'ehina.

<sup>27</sup> To Moseu ai keheli ule'ale hu'ehina'mu yabe luto gihihi bo, Felohi ita bilata nohina'mu ya'ma lesa meligo keheli he'mito Iyipi me'i ya'ma he'mi'ehina. He'miloto i behe huto aku'i analo mebulata nohuto Hu'mamofifi bu megolatanamofifi ai bu'atu bu go'ehina lolo higo aitoga buto i kolo'ehina yabe. <sup>28</sup> To Moseu ai keheli ule'ale hu'ehina'mu yabe luto ligi mone

nose'na sipisipi yaga hete lete bauna lilata nohina'mu Pasa yabe lite ana yagamofahi golahi kasito luga luga lepe tepe hite mine'ahana ya'ma nose'na kana Moseu lu laga huto lu molo'ehina ka'a Isilaeli bona'magi keheli'ahana. Enali yege pana'ani nehago enoho fililana agelouba bulenogo enoho su ho lalibe luto ligo enali ana golaha'atu nohi kasihi yafalo fele'ahana.

<sup>29</sup> Isilaeli bona'i enali keheli ule'ale hi'ahana'mu yabe lite hege nagami'mofahi gi'a golaha nagamilugu li hokolo hu epalago ya'ma me'i kuguta hinaga bi'ahana. To Iyipi bona'magi ete ya'ma ana hite bilune lite ana sepa ina kapogu nebago hege nagami'uba enele'mo iti kago supa ne'ahana.

<sup>30</sup> Isilaeli bona'magi keheli ule'ale hise bona'i nehabe lite ya'ma Yeliko hepato efaha gegisalo ya'ma fi bego bego hite tibite kana 7 yege yupahi su nohago sipi gegisa'ani limilibi lite nebago fululu poto ko'ehina yabe. <sup>31</sup> Kapogu mokolo a'i Lehapu ai keheli ule'ale hina'mu yabe lite bo loemale'i yata'a fateha'animofahi me'i be galu'ibe'mu fala kite bi'aha'ina. Lehapu ya'ma ana bole noha'agu etele'mo malago al-ihii Yeliko bona'i Hu'mamofahi ka'a pelesa ilata hi'ahanamagihi ya'ma Hu'mau enohoto Lehapuhi buto bi'ehina.

<sup>32</sup> Ya hi'ahanaya ka luga'a henabe luto lu su halube? Gitioni to Balaka to Semosoni, to Yepata, Tebiti, Samueli to kaga lol'i'ali bona'i enali kumu ka lu su hoto liluna'a huto ni'itita lolito nobugo yatama hitine. <sup>33</sup> Enali keheli ule'ale nehana bona'i asaga'i nehabe lite luga'amagi

melugu bona'i asaga'naloga enele'mete limite  
 enebe ligil'ahana ya'ma enegekesa lise foya lite  
 enele'mo fotoga hite Hu'mau mina'a epilube luto  
 lu epolo'ehina yanamofhi legeya'a li'ahana. To  
 luga'amagi lopi kalamagi heni letalabe lite ana  
 kalamagih enabagalo fi hekini le'ahana ya ne-  
 hago,<sup>34</sup> luga'amagi logo guluya mepofiji kenet-  
 ufa'alo li sabago ketipa i'ehina. To luga'amagi  
 lubamofhi gupisalo netite fateha'animagi emi-  
 tatu keyete enoho fililune lana'a he'mi epelete  
 bifa hi'ahana. Kenebe mebi'ahana'amagi aku'i  
 ya'ma amuya mele'ahana. Luga'amagi lubagu  
 amuya melete me'i luga'agati kala bo'ani eno-  
 hobe logobe hi'ahana.<sup>35</sup> Ana'i luga'amagi ke-  
 heli ule'ale hina'mu yabe lite Hu'mau yaga-  
 pana'ani fili'ahanaguti enele'mo ho tiloto aku'i  
 ito'anigitoga enele'mo hepi'ehina.

To bona'i luga'amagi osahi enehete kalana'i  
 mele epele'ahana ya'ma mono ka he'minogo  
 lenubuto bilupihe lite kalana'i li epi'ahana  
 alihaga lamana huse'nagu ho tilune lite  
 kehelilete fateha'animagihi kaga kehelii he'mite  
 fili'ahana.<sup>36</sup> Bona'i luga'amagihi fateha'animagi  
 kiya hi epelete kalana'i mele epelete segi  
 osatu enehe'ahana. To luga'amagi minago  
 fateha'animagi enigito enayato naga'l'i gilete naga  
 nonugu he'mi epele'ahana.<sup>37-38</sup> Luga'amagi  
 enali efa kosatu enehe fili'ahana, to luga'amagi  
 ya'ma enugufa hobe laga hibe hi'ahana. To  
 luga'amagi ya'ma sopolotu enehete enoho  
 fili'ahana. Luga'a enali kehelii ule'ale hite  
 minana'mu yabe lite enoho lifi he'migo enali

ka metoga bite fa'mene fakasalo minete to kosagu yup'a'i hite minete, mehi kapoluga to muli kapoluga kete humofa'na hite mine'ahana. Ya hite minete, i kolo bise gu'ani meni'igo sipisipimagihi mememagihi kalupa'a lite i kolo bite minete kau'namu filite minete, musufalo bona'i ya suhi hite minete to fateha'animagi enegene mane igo keke'i luse'namofahi gupisalo tite mine'ahana. Ya hi'ahana bona'i luga'a enali henana'aniloti melugu i hepite minenogo bati hilibe?

<sup>39</sup> Ya hana'amagi enali asaga'i keheli ule'ale hago Hu'mau bu enogo laga higo bati hu'ehina. Ya huloto aku'i Hu'mau hetofa nasana epilube luto ya'ma kaga lu molo'ehinamofahi legeya'a ana kanalo metoga mine'ahana'a enali ya'ma meli'ahana. <sup>40</sup> Henabe luto meli'ahana? Hapa'a ma huto ni'ibe. Hu'mau ai lalitoga ana'ina be ligito ni'ina'a molo letalube luto lu kehelito mino'ehina yamofahi enali kohe tete bati hite minalana'a ya'asigo meni'ibe. Alihi ya'ma lali hiti buto mino hepitobebeseno minaluta nasana ya'ma li huto hilabe luto lu epolo'ehinamo ni'ibe.

## 12

### *Hu'ma lali afotifu nohibe*

<sup>1</sup> Keheli ule'ale huse'namofahi hapa'a li huto hi'ahana bona'i samahi tite sopopo suhi hite minete lele'mo bego bego hi'ahanamo ni'inagihe, yamofahi fifa ilata nehana bona'magi hololu lilata nehanamagihi hapa'ani'mu kehelito minoto keta'a hiti nasana ya'ma gololo tito li he'milune. To foipanamofahi hapa'auba lugufalo

naga'i gi'ehina hiti li toba hoto li he'milune. Ya hulototi kapo lelepi'ehina analo kosele'i melehenogo hololu luto fotogo huto bilunagihe.

<sup>2</sup> Ya nohutoti keheli ule'ale huse'nati'mu lele'mo kohe tolatana to yanamofahi legeya'a li huto hulata bo, Yesu ya'ma babeyafa'amofahi suhi huto minoto aigo'isi bu go bati huloto hololu luto buto minalune. Ai gelo bise'na ya'ma o nehetibe luto lu'ohunamo yamofahi keheliloto li pigi bise'na fela'amofahi gupisalo ti'ehina'mu keheligo fa'menena lolo higo malipu yafalo sipi keke'i lu'ehina. Ya huloto Hu'mau nohina sekele mamu'a hiti kefa hisalo yahi lamaga'aga tito mino'ehina yabe.

<sup>3</sup> Foipa nasana lilata bona'i kegeiyo hite ita bi'ahana enali ya suhi hi emigo ai keheli he'mito amuya molo'ehina. Lenali ai kumu keheli emite kosele'i meleneheno. Komopatini hekini lo laligi ai'i li pili kalo. <sup>4</sup> Lenali foipanauba lenele'mo ho kalube'mu nohinogo amuya melete luba nehago lenugufatini laga hago golahi mele'isi mehu'ehibe. Mineme bite minelata nasana yamofahi mino'ehinamo ni'ibe.

<sup>5</sup> To Hu'mau panana'ni yabe luto luloto amuyatini lito lenele'mo amuya moloto ka'a mone lu lepi'ehinamo ya'ma lenegekesu ho'ehifiye? Ya. Ka'a ma luto lu'ehina:

Pana'ni kai'i  
 Sipi Boubia kele'mo bati hilube luto  
 ka kemekinogomo  
 osahi kimilina'mu kehelitogo  
 sibina mehino.  
 To foipa nasana'mu ka kemekinogomo

komopaka hekini meleno.

<sup>6</sup> Sipi Bo ai komopa'a epilata nohina bona'i  
asaga'nalogga hima muhi fi epoloto  
enele'mo bati hulata nohibe.  
To ai yagapana'a lamana'a  
enele'mo molo'ehina  
silaga panana'amagihi segi osahi epito  
enele'mo fotogo hulata nohibe.

<sup>7</sup> Sipi Bouba osahi lepilenogomo kosele'i me-  
lenehenogo amuyatini gulu mefeno. Hu'mau  
bu gago ai panala'i pana'i lolo hinogo lenele'mo  
bati hilube'mu ya suhi lolo hu lepololata nohibe.  
To bo moneubafi moneuba pana'a osahi emit  
le'mo bebe salina'a huto ni'ifihe? Enele'mo  
bati hulatana ya'ma bonatoga silaga'i ya suhi  
hilata nehanabe. <sup>8</sup> To Hu'mau ai ana suhi  
huto yagapana'a silaga'i enele'mo bati hulata  
nohinabe, lenali'i ya'ma ya mehu lepelenogo  
minalana ya'ma panala'a pana'a lolo hite mem-  
inalana'mu yagi ya'ma kapolo a'mofhi pana'i  
yabe luto lu lepalalina'mu yabe. <sup>9</sup> To mone lilugi,  
metoga afotigi enali ya'ma segi osahi lahago  
lali kegeiyo mehuse enele'mo hofa toto agoya  
hu epi'ohutamo ni'ibe. To komopati afotifhi  
ya'ma ai maha'aga limite nohuto ya'ma bati  
hilube'mu nohibe. Ya hulototi mino hetofa hili-  
naga mino moloto minaluta'mu yabe. <sup>10</sup> Afotigi  
enali'ani enegekesa keheli'ahanalo ya'ma fuku  
kana tupa'asi nobigo osahi limite lele'mo fo-  
togo hite minelata hi'ahanaya, Hu'mau ai'a  
ya'ma ana'ina legeya'a li huto hu limilibe luto  
to ai'a bebe sose'na ni'inalo ya'ma molo emi-  
labe luto ya hu letalube'mu nohibe. <sup>11</sup> Osahi

limito lele'mo bati hulata nasana ya'ma huto hulenogomo kana'a kehelinogo laga menohigo keke'i luse'na'a hiti lolo hulata nohibe. To al-ihā'aga ya'ma mino bati hulata'nagu minolata nohutamofihu legeya'a ya'ma i tili tele huto lali-toga fulunamofihu nasana huto hilina'mu yagi to hapati lamana'a lolo hulata nohibe.

*Lipoti lu limi'ehina ka*

<sup>12</sup> Ya hu'ehina'mu lenali komopatini haya kolo'ehina lenigi lenayahi kakite kalune'mu ne-hana ya suhi hite ate ate mehise amuya melete mineno. <sup>13</sup> Mono'mofihu kapogu bilune'mu ne-hitemo lenigi sibina hu'ehina'a mine'ahana sibina hu su ho laligi aku'i molo emilenogo bati huto ye kolenogo Hu'mamofihu kapogu le'mo fotogo hilete humofa'na hilo.

<sup>14</sup> Lenali bona'i asaga'i enali hiti koguna ite minalune lite nelite to komopatini hepinogo mino eto hite minalune litemo amuya malalo. Komopa'ani kolo tago nehilana'amagi enali Sipi Bomofihu be megalana'mu yabe. <sup>15</sup> Lenalitogati bo mone Hu'mamofihu lehe'mose'na li he'mito i behe huto bu laligi kaba hite minalo. Ya nehit komopatinigu ekesa'namofihu foipana moneuba leneme'na leneme'na bito lulata nohina ya suhi huto komopatinimofihu ekesa'nauba sipi hulenogo bona'i yege yege'magihi komopa'ani haya kolo laligi kaba hi epelelete minalo. <sup>16</sup> Ya nehit lenalitogati moneubafi moneuba Isau bu'ehina kapolo mone mebilibe. Mokolo bona'i enali mino eto hite meminalata to metoga bona'i mone'amagi mono kagaloga mege'i memalalata ya suhi huto meminalune lite kaba hu bati hilo.

Ya'ma Isau ai moneko nose'namu yabe luto ema'aga yege'a nohinalo alihi huto hu emilina fe-lisa fe'nohi yama he'mi'ehinamo ni'ibe. <sup>17</sup> Lenali ai hapa'a akehel'i'ahabe. Ai alihi afo'afitogati lusa gise'na lilube luto noligo afo'afu o'e lu etago ana'ina lolo hu'ehinamofiji hena huto su halibe luto kehelito ya'ma sibina hu'ehinamofi kumu komopa'a i behe huto ana lusa kapolo sa sa hu-loto aku meni'igo yibi hafli huto mino'ehinamo ni'ibe.

<sup>18</sup> Koyapa'i Isilaeli bona'i le'mo ya suhi hite Sainai kosalo li gehe lilata nehana beleha'aga ana suhi hite meabe. To fi'mo moneuba analo sipi logo loto guluya meha'agu ya'ma to sinihi metepu ginagu to yasi linagu yamofiji komopa'agu bu mefele'ahanamo ni'ibe. <sup>19</sup> Lenali Sainai kosaguti pikuli fi'ahana to nogo sipi mone molo'ehina mekeheli'ahana ni'ibe. Keheli'ahanamagi ya'ma ka'a mone'a hiti mekehelilune lite buka buka tite amuya melete mine'ahanamo ni'ibe. <sup>20</sup> Ya'ma nogouba ma luto lu laga huto lu epi'ehinamo ya'ma keheligo keta epesi'ehina: *Bona'i luga'a enali enayatu kosalo bako nehinogomo lenali efa kosatu enoho fililabe. To yagamagi asaga'i ana suhi hite lolo hi epalalabe.* <sup>21</sup> Ana nasana ya'ma koli huse'na'a hiti sipi huto nohigo Moseu ya'ma bu goloto: *Nani yanamofi kumu nelesa'ni noligo afoya foya noube*, luto lu'ehina yabe.

<sup>22</sup> Lenali kosa ya legi huto ni'igopa, lenali Yiona kosagu bite mehi mino lito minolata bo, Hu'mau ai nohi hep'a'aga kokulumalugu Yelusale hep a tegi huto ni'ina hepato ime ime neheti'ahabe. Ya nehitel aghelo leka sete leka so su mehose

suhi hite samahi tite nehana,<sup>23</sup> to ai yaga-pana'a lamana'a enigi'ani kokulumalugu koyo molo'ehina'a enali enegelo bite li nupa hite minanalo bu neheti'ahabe. Ya nehit e asaga bona'i hapa'animu foipana'animu guna molo epalalina bo, Hu'mau nohinalo ime ime neheti'ahana. To lamana hite mine'ahana bona'i buto i segito minolata'nagu enele'mo molo'ehina'a enali suhi hite molo emi'ahañamo ni'ibe.<sup>24</sup> To lu mu tifise'namofihu ka'a kosaba'i li huto huloto folagahatigu nohina bo, Yesutoga abu neheti'ahabe. To koyapa'i Ebelihi golaha'auba ya'ma meluguti Ebeliu ho fili'ehinamofihu foipana'mu pa salibe luto lu'ehina. Ya huto ni'igopa, Yesuhi ai'a golaha'auba fepa kopa i'ehina yanauba lelito tito ana'ina legeya'amu fifa ito kehe ilata nohina yalo bu neheti'ahabe.

<sup>25</sup> Lenali ka'a lu lepilata nohina ya'ma keheli mehe'mise kaba hite minalo. Koyapa'i Moseu ya'ma metoga minoto Hu'mamofihu ka'a mone lu epigo ka futu'a yabe lite he'mi ete'ahana bona'i enalitoga ana'ina enoho fililabe noligo koli'a hiti huto hu epi'ehinamo ni'ibe. Ya hu'ehinago yatai ya'ma kokulumagu minoto ka'a lipoti lu nolimina bo ai ya'ma lemegesa hu emitoti hena hena hinogoti lemehi mebinogo minalune?<sup>26</sup> Koyapa'i nogo'a ya'ma Moseu mino'ehina kana'agu me'i mopo mopo hu'ehina. Ya hulago nogo'a mone yatai lubutilo ma luto lu nolimibe: *Nani minoto me'i ya'ma aku'i le'mo mopo hiluna'mu yabe. To ya nohinogo kokulumaga hiti ya'ma moneko kumu le'mo mopo hiluna'mu yabe,* luto Hu'mau lu'ehina.<sup>27</sup> Ya'ma *aku'i*

*le'mo mopo hiluna'mu yabeluto lu'ehina yamofahi ana'ina li huto hu'ehina ya'ma le'mo mopo huloto le'mo gehe lilube luto lu'ehina. Le'mo bati hulenogo ule'ale huse'nalo lemehi emit minolata'na mopo mehilina nasana ya'ma huto huloto mino lito buto minalina'mu yabe.*

<sup>28</sup> Ya hilinagi lali Hu'mamofahi kapo'a lilune'mu nohutamofi kumu mopo mopo mehilina minoba minoba nasana lalitoga minalibe. Yana'mu lali Hu'mamofahi fokehi halutagihe. Ya huloto bita nohina'alo mege'i moloto aitoga legelo lagalo bito amuya'a hiti legeso huto agoya hu emino. Ya nohinogo ai'a kehelito bu go laga hinogo bati hulenogo agoya hu emit minalune. <sup>29</sup> Ya'ma hena'mube? Hu'ma, afotifu yabe. Ai'a ya huto lo su holata logo'a hiti nohina bo, ai'a nohibe.

## 13

*Hetofana lolo huto nehinogo Hu'mau gelo bili-namofahi ka'a*

<sup>1</sup> Mono kagu gona'a go'afahi komopatini ai eminogo ai eminogo hilata nehanamofahi ya'ma lenalitoga su meheno. <sup>2</sup> To ka'i logo lili bona'i enebe tigite nohatiniluga enele'mo malalune lite kosele'i meleneheno. Luga'amagi enali bonoho bona'i atilo lite enele'me mele'ehite agelo nehana'muya enali mekeheli'ahana. <sup>3</sup> Lenigibo lenagabo, mono kumu yabe lite lalutimagihi naga nonugu enele'mo mele'ahana'a enali kumu kehelite ana naga nonugu lali minaluta suhi hite nehabe lite kehelite lenekesu meheno. Ya nehiteluga'a enele'mo sibina sabana hi epele'ahana'a

enali kumu keke'i luse'namofifi komopa'agu neminana'a ya'ma lenali ana hite keke'i luse'na'ani lenugupisalo suhi huto ti'ehina'a kehelite enali kumu lenekesu meheno.

<sup>4</sup> Bo alobole nemina'ina asaga'i ya'ma legeya'amofifi nasana'mu keheli emilabe. Bo alobolemale'i lolo neha'ina suhi lite li sibi mehilo. Mokolo'na to ate ate lite humofa'na nehana bona'i enali'i Hu'mau foipana'animofifi nona'a molo epalalina'mu yabe.

<sup>5</sup> Lenali komopatini yogo fe'notoga mebino. Ana'inatini li'ahana legegeto yana'mu babahi hite le'mo fulu hileno go bati hite minalo. Hu'mau ai'a ma luto lu'ehina: *Nani mone mehe'mi lepalaluna'mu yabe. To nani lenalitogati mone bufa mehiluna'mu yabe.* <sup>6</sup> Ya luto lu'ehina yana'mu lali amuya lilototi mono bukugu fayahi keye'ahana kaga ma luto lilutagi:

Sipi Bouba ai nele'mo bati hulata  
nehe'mose bo nohinagihe.

Nani ana'ina yana'mu  
coli mehiluna'mu yabe.

Bona'i enali hena hite  
nele'mo sibina hilabe?

Yanamofifi nelesa melilina'mu yabe.

<sup>7</sup> Yata'a kaba botini Hu'mamofifi ka'a lu lepilata hi'ahana enali kumu beto hite minalabe. Ya nehite mono'mofifi kapo'alo nebite fili'ahana'a enali enigiyaka'a bu goya ite minete enalitoga enemege'i melete keheli ule'ale hise'namofifi komopa'agu ya hite minelete lenekesa kehelilo. <sup>8</sup> Yesu Kilisitou ai'a koyapa'i kohe toto mino'ehina to yatai hiti minoto ana suhi lolo huto mino lito buto

minalina'mu yabe. <sup>9</sup> To fato fato'namofahi kosaba kaga nelite li lenelepinogomo kehelite kaba hu bati hilo. Ana kagauba lamana kapo i pebis a hete nebinogomo enemege'i memalalo. Hu'mau lenehe'mose'nauba komopatini le'mo hetofa hu lepelenogo ya'ma bebe salube'mu nohibe. Nose'na nolatanamofahi mo silatanamofahi lu laga hi'ahana ka yanauba mone lele'mo bati mehilina'mu yabe. Yamofahi kapo'alo bi'ahanamagihi legeya'a mone li huto mehi'ahanamo ni'ibe.

<sup>10</sup> Mamufa gilata hitalo mele'ahana nose'na ya'ma Yuta bona'magihi bebe sose go nonugu Hu'mamofahi agoya hi emilata nehana bona'i enali nalabe luto keheli meepi'ehina yabe. <sup>11</sup> Lenali akeheli'ahabe. Mamufa gilata bomagihi kaba bo'aniuba meme yaga bulumaka yaga hoto ho gilito golaha'a ya'ma foipa nasanamofahi kolo tanana'ani nokala hu epololata mono nohi bebe sose nonugu lelito tilago ana yagamagihi gufa'ani bihu gegisaguti nosipetoga lelite limite logogu ge epelelata nehabe. <sup>12</sup> To Yesu ana huto ai'a golaha'atu foipa bona'magita komopati nokala hu epalalube luto bihu gegisaguti nosipetoga hago fili'ehina yabe. <sup>13</sup> Ya hu'ehina'mu lali ana huto Yuta bona'magihi koyapa'i mono gegisaguti nosipetoga aitoga limite gupisalo gili hite kiya hi'ahana nasana ana suhi huto lugupisalo tinogo kofilune. <sup>14</sup> Ya luto nekehelito ya hilune. Minoba minoba hep'a'i mone maga lalitoga meni'igi fa'mene minoto hep'a'i huto hilina'a yamofahi ya'ma komopatiuba geba hulata nohibe. <sup>15</sup> Ya'mu asaga yupahi lali Yesuhi

gi'a le'mo saga huto labagaguti Hu'mamofitoga  
 molo emitō fokehi hoto minaluta nasanauba  
 lali mamufa gi emilutana lolo hinogo Yesuhi lu  
 eminogo Hu'mamofihī lepilibē. <sup>16</sup> Hetofa foya  
 lilatana agoyana hiti to fe'nohi guna ite epilune  
 lite lenegekesa kehelite minalo. Hu'mau ai'a  
 yanamofihī kehelito bu go laga nohigo mamufa  
 gi emilata nasana suhi huto legeya'a lolo hulata  
 nohibe.

<sup>17</sup> Kaba botinimagihi ka'ani kehelite agoya  
 hu epite enali enigi'aluga limite minalo. Enali  
 ya'ma lenemehatinimofihī nasana'mu kehelite  
 babeyafalo kaba hi lepelete le'mo fu lite  
 neminetē enabasu mebilata nehabe. Ya'ma  
 foya'animofihī hapa'amu alihī kanalo ya'ma  
 foya lilatana Hu'mamofihī bulo li huto hilana'mu  
 yabe. Ya hu'ehina'mu foya'ani komopa'a le'mo  
 bati hite lilabe linogomo agoya hi epelete ya suhi  
 ma suhi li epalalo. To lenali pelesa ilenogomo  
 enali keke'i nelite foya lilabe. Ya hinogo ya'ma  
 lenele'mo bati hilina nasana lenalitoga huto  
 mehilina'mu yabe.

<sup>18</sup> Lenali lali kumu yabe lite Hu'mamofitoga  
 kaga lite minalo. Lali eto huloto legekesa kehe-  
 lise komopatigu bati higo keta huse'na meni'igo  
 keheliya ito asaga yupahi eto huloto lito moloto  
 hilune luto amuya mololata nohune. <sup>19</sup> Lenali  
 Hu'mamofihī nani kumu loka halo, ya luto buka  
 notube. Aitoga ka lu emilana nele'mo bati hu-  
 lenogo ai hupamone kana nele'mo behe hinogo  
 lenalitoga mele'isi bilube luto lu nolepube.

*Hu'mau lusa gi lepalalibe luto lu'ehina ka'a*

**20** Fulu husemofahi afo'afu, Hu'mau ai Sipi Boti Yesu ai'a golaha'atu lele'mo bati huto ule'ale hu letoto minolatana ya'ma minoba minoba mu tifise'namofahi ka'a li huto hina'mu yabe luto sipisipi yagamagihi kaba bo'ani lolo hu'ehina bo fili'ehinaguti le'mo ho tito ho lifi'ehina bo nohigi, **21** ai'a ya'ma nasana lamana'a fato fato'mofahi li huto hu lepito lenele'mo babahi hulenogo ai lilina'a malalina'a keheliya ilabe luto nolube. Ya nehinogo ai'a kehelinogo bu go laga huse nasana Yesu Kilisitohi amuya'auba komopatinigu mineno. To ai fana mehena'a huto hilenogo foke ka lelite binogo mino lito buto minalinamo ni'ibe. Lama'naka.

*Ka'a anasi su halibe*

**22** Nigibo nalalu'nigita, nani kaga mone lu lepi'ohuna'a yatama meni'ibe. Lenali lenegekesa lito lufusatini li hetofa hilina ka'a ya'ma lu nolepugi lenekesa li hokolo hite kehelite minalo. **23** To lu lepilugi kehelilo. Lalalutifihi Timoti naga nonuguti gulu he ete'ahago ai mele'isi oto nanitoga nehetinogomo le'moto binogo ma'asi lenalitoga bilube'mu ai hiti bu lenagalu'ibe, luto nolube.

**24** Kaba botinimagihi hiti to Hu'mamofahi bona'a asaga'magihi nehafihe luto'ni keke'i nolu lepolonagihe luto nolunagi lu epilo. Itali metogati lenalalutinigi enali hiti nehafihe lite keke'i neli epalago lu nolepube.

**25** Hu'mau lehe'mose'na yauba lenalitoga mi-nomo buto mineno.

**Ka Lamana'a Mono'i Lu Mu Tifi'ehina Ka  
Yabe**  
**The New Testament in the Benabena Language of  
Papua New Guinea**  
**Nupela Testamen long tokples Benabena**

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

---

PDF generated using Haiola and XeLaTeX on 11 Nov 2022 from source files  
dated 9 Oct 2020

429cb299-5ab9-51c4-8857-9de5c72f8388